


# সাহিত্য বারো রাজনীতি

ইন্দ্রকুমার সিংহ





# সাহিত্য বারো রাজনীতি



ইন্দ্রকুমার সিংহ

**SAHITYA BARO RAJNITI** A collection of Story & Essay  
Bishnupriya Manipuri Language by— Sri Indra Kumar Sinha,  
Kabuganj, Cachar, Assam

---

- প্রকাশক :- শ্রী ইন্দ্রকুমার সিংহ  
ভাটিৰগ্ৰাম, কাবুগঞ্জ  
কাছাড়, আসাম।
- ফণ্ডনি :- বিষ্ণুপ্ৰিয়া মণিপুৰী সাহিত্যসভা  
অফিস- মণিকান্ত ভবন  
সারদামণি লেন, কলেজ রোড  
শিলচর - ৭৮৮০০৪  
ফোন :- ৯৮৫৪০২৯২৬৯
- ফণ্ডনিৰ দিন :- ....., ২০১৬ইং
- ছাপানিঃ :- সরলা ড্ৰুয়েভ  
ভকতপুৰ চেংকুড়ি রোড,  
শিলচর-৭৮৮০০৫  
কাছাড়, আসাম।
- মূল্য :- ৫০.০০ ৰূপা

## উৎসর্গ

বিষ্ণুপ্রিয়া মণিপুরী সাহিত্য সভার পয়লাকার  
প্রতিষ্ঠাতা সভাপতি \*গোকুল সেনা সিংহ গিরকর লগে  
পরিচয় অনা এহানৌ জীবনর আলাদা অধ্যায় আহান।

গিরকর ভদ্রতা, সহানুভূতি, সমাজসেবার একাগ্রতা,  
নেতৃত্বদেনার লৌশিং মোরে নিয়াম কাদাত চেপকরেছিল।  
তার সঙ্গসুখা আজীবন হৃদিত ঙালয়া আছে।

গীরকর নিংশিঙে

লেরিক শৌ এহান


থামপালগোর সাদে

মধুময় অয়া পালইতই

এ আশালো অতি

শ্রদ্ধালো কাংকরলু।

—ইন্দ্রকুমার সিংহ







## লেখকৰ কথা আক্ৰুটি

এ পৃথিবীৰমা কালে কালে নানান ঘটনা ঘটে যাবগা। ঔ ঘটনা উতা দুঃখময় অইতেউ পারে বারো আনন্দময় অইতেউ পারে। দুঃখ বারো হতাশার সৃষ্টি অইলে সৃজনশীল লেখক বা লেখিকা জরম অয়া মিঙালপা পথ ইলকরেদিয়া উহানৰ সমাধান আহান করে দিতারা।

ইউৰোপে সময় আহান দাস প্রথা চলেছিল। মানুৰে বাজারে নিয়া বেচলা। গুরু, মইষ, ছাগীৰ সাদে মানুৰে ব্যবহার করলা। ঔ দুঃখময় তানজা উগৎ তানুর দুঃখৰ, তাপিত্বৰ ছবি উহান পৃথিবীৰ মানুৰাং তুলিয়া ধরেছিলী আমেরিকার লেখিকা আঁগে। তেইৰ নাঙ — হেরিয়েট এলিজাবেথ বিচার ষ্টো। লেঙকরা লেরিকহানৰ নাঙ — ‘আংকল টমস্ কেবিন।’ ঔ লেরিক উহানে ইউৰোপে বিপ্লব আনেছিল। বিভিন্ন দেশে আইন পাশ করিয়া দাস প্রথা নিষিদ্ধ করেছিল। সাহিত্যৰ ভূমিকা সময়ে সময়ে এসাদে অয়া প্রকাশ অর।

আমার ভারতবর্ষৰ স্বাধীনতা বিপ্লবে বঙ্কিমচন্দ্র গীৰকৰ ‘আনন্দমঠ’ বারো কবি নজরুল ইসলামৰ ‘অগ্নিবীণা’ মানুৰে খৌতাল দেছিল। আনন্দমঠৰ — ‘বন্দেমাতরম্’ ধ্বনি বিপ্লবে জাগরণৰ জোয়ার আনেছিল।

এসাদে করে পৃথিবীৰ বিভিন্ন দেশে সাহিত্যিক গীৰকগাছিয়ে কলমৰ মাধ্যমে বিপ্লব আনেছিল।

আমার হুৰুকাঙ জাত এহানৰ সমাজ বিবর্তনে — সরকাররাংত দাবী আদায় করতেগা সমাজে বহু অনৈক্যৰ সৃষ্টি অছিল এহান হাবিয়ে হারপাছিহান। পদে পদে বিভেদৰ সৃষ্টি অছিল; এরে নিয়ম এহান বারে বারে দেহা দিলে সমাজে ভবিষ্যত উন্নতি নিয়াম হিনঅয়া যিতৈগা।

বর্তমানে পৃথিবীত হুৰুকাঙ জাতৰ ভাষা, সংস্কৃতি নিয়াম ত্বরা অয়া মিমুত অইতে আছে — অইতে আছে। এরে বিশ্বংসী হত এগত মানু যদি আত্মজ্ঞানী নহিতারা উহান অইলে কাকেইহান লেহে বিপদ।

এরে অবস্থাত মোৰ ইকরা লেরিক শৌ এহান যদি মানুৰ হৃদিত যদিশে মিঙাল আহান দেনা পারেৰ উহান অইলে লেরিকশৌ এহানৰ সার্থকতা বিচার অয়তৈ। একমাত্র পাঠক গিরিগিথানীরাং এহানয় এহানৰ মূল্যায়ণ অনাৰ ভারহান থাকেলগা। ○



## কলম এগো তরোয়ালহানাভৌ জিঙে



আমার সমাজর বিখ্যাত লেখক বারো নাট্যকার শ্রীযুক্ত ইন্দ্রকুমার সিংহ গিরক, যোগো কাছাড়র বারমুণিগাঙর ভাটিগ্রামে জরম অসেগো। গিরক কনাক কালেস্ত সাহিত্য বারো নাট্যর গজে অনেক লেরিক লিখিয়া বিষ্ণুপ্রিয়া মণিপুরী জাতর সাহিত্য ভাণ্ডারগো আরাকৌ সমৃদ্ধ করেদেসেগো। বর্তমানে তা আরাকৌ লেরিক ইকরের। গিরকর অদ্য যে লেরিকহান লিখিয়া প্রকাশ করের এহানর নাঙহান অইলতাই “সাহিত্য বারো রাজনীতি”। গিরক সাহিত্য সভার উপদেষ্টা বারো বিখ্যাত লেখক আগো। গিরকে লেরিক এহান লেখানির মূল উদ্দেশ্যহান অইলতাই আমার সমাজর মানুরে সাহিত্য বার রাজনীতিত চেতনা বোধ আনেদেনা। বর্তমান সমাজ ব্যবস্থাত যে কোনজাত আহানর রাজনীতিত অধিকার বার দখল নাথাইলে ও জাত উহান নিজর অস্তিত্বল প্রতিষ্ঠিত অনা সম্ভব নাগই এহানেই লেরিক এহানর মূল বিষয় বস্তুহান।

আমেরিকার লেখিকা হেরিয়েট এলিজাবেথ বিচার ষ্টোজিথানক দুর্বল মানুর গজে সবল মানুর অত্যাচর বন্ধ করানি উদ্দেশ্যে লেরিক আহান লিখেসিলি উহান অইলতাই “আংকল টমস্ কেবিন”। এ লেরিক এহান প্রকাশ অনার পরে মানুর মনে এতই প্রভাব বিস্তার করলো যে আমেরিকাত প্রথম সপ্তাহে দশ লক্ষ বার ব্রিটেনে একবছরে তিন কোটি কপি বেসানি অসিল। পৃথিবীর ৬০হান ভাষাত অনুবাদও অছিল। লেরিক উহান এতই মূল্যবান বার জনপ্রিয় অসিল যে ঔসময়র আমেরিকার প্রেসিডেন্ট এব্রাহিম লিংকন আমেরিকাত দাসপ্রথা উঠাদেছিল।

আমার লেখক গিরকর লেরিক এহান পাকরিয়া মি অত্যন্ত হারৌ বার মনপুত অইলু বার এহানও আশা থউরি যে লেরিক এহান পাকরিয়া আমার সমাজর মানুর মনে বিশেষকরে শিক্ষা বার রাজনীতির গজে চিন্তাধারা অনেক পরিবর্তন আনেদিতই। সাহিত্য সভার পক্ষস্ত গিরকরে অশেষ ধন্যবাদ বার প্রশংসা জানেয়ার।

এ লেরিক এহান ছাপেইতে যে যে গিরিগিথানীয়ে রূপায়সাল সহযোগিতা করেদেছি অউ গিরিগিথানীয়ে সাহিত্য সভার পক্ষস্ত নিয়ামপারা কৃতজ্ঞতা বার ধন্যবাদ জানেয়ার।○

মণিকান্ত সিংহ

সাধারণ সম্পাদক

বিষ্ণুপ্রিয়া মণিপুরী সাহিত্য সভা।



শ্রীসুভাষ চন্দ্র সিংহ প্রাক্তন প্রধান শিক্ষক  
পাচডালী গিরকর প্রতি কৃতজ্ঞতা।



মোর সাহিত্য সাধনার পইলার উৎসাহ, চেতনা আদির কেন্দ্রগ অইলতাই সিংলা লয়ার 'মদন মোহন রাজবংশী গীরকর পরিচালিত 'ফাগু' পত্রিকা। জীবনর পইলকার জয়মাত্রা। এরে পত্রিকা এহান যদিশৈ সৃষ্টি নাইলৈছ মোর এবাকার অবস্থান এহান সম্ভব অনাৎ সন্দেহ আছিল। হুদা মি নাগৈ কবি 'মদনমোহন মুখার্জী কবি 'সেনারূপ সিংহ বার কবি ব্রজেন্দ্র কুমার সিংহ তানুউ মোর লগে আকসাটে উপকৃত আছিল।

এরে ডাঙর ঋণ এহানর সালেদে সিংলা লয়া এগর প্রতি মোর গভীর শ্রদ্ধা, বনা নুংশি আজীবন থযিতৈগা।

এতার হাদিত মোর অনুজপ্রতিম শ্রীসুভাষ চন্দ্র সিংহ গীরকর লগে কর্ম ক্ষেত্রত বহুদিন যাবৎ একাত্মা অয়া আছিল। হাদিত রাজনীতির গজে ইকরানিরকা প্রায় মোরে অনুরোধ জানাছিল। মোর লেঙকরা তিনহান নাটক, কৈলাসে লৈলাট, স্বর্গর রাজনীতি বার ইলেকসন রাজনীতির গজেই সৃষ্টি করেছিল। কিন্তুমান প্রবাস্কাকারে আলাদাভাবে লেরিক ইকরানির কোন দিন চিন্তা নাকরেছিল। সুভাষ গিরকে আলাদা ইকরানিরকা বার নিংশিঙ করে দিল। খাংখা শেষ বয়সে এরে লেরিক এহান ইকরতে বাধ্য অইল। এহানরকা তারে কৃতজ্ঞতা জানাউরি এহান একান্ত নিজর অনুভূতিহান।

উতাছাড়া তার ইকরা 'পাচ ডালি গাঙর ইতিহাস' পাকরিয়া মি নিয়াম হারৌ অছিল। তার মাতৃভূমির প্রতি গভীর অনুরাগ লেরিক এহানর মাধ্যম উপছিল। এরে লেরিক এহানর মাধ্যম ঔ দূরেইর মানুর নাঙ, গোত্র এতা পেয়া হারপাছিল। এরে মহতী প্রচেষ্টা এহানরকা অন্তরর শ্রদ্ধা জানাউরি।

সমগ্র সমাজে প্রত্যেক গাঙর এসাদে ইতিহাস আকেইহান যদি আজি থাইলৈছ সমাজর হাদির আদান-প্রদান অতি সহজ অনা সম্ভব অছিল। খামতলে পাচডালি গাঙরে নিংশিঙ অয়া মাতৌরি—

সুভাষ আয়া পাচডালিরে চিনা দিল হাবিরাং

দূরেইত থায়া আমি হাবি তানুর হাদিত চেপৈলাং। ইতি

শ্রী ইন্দ্রকুমার সিংহ

## সূচিপত্র

১।	রাজনীতির অচেৎপা তত্ত্ব .....	৯
২।	সাহিত্য বারো রাজনীতি .....	১২
৩।	রাজনীতিত উদারতা বারো কঠোরতা .....	১৬
৪।	মারপানা বা বন্ধুত্ব .....	১৭
৫।	রাজধর্ম বারো রাজনীতি .....	১৮
৬।	ধন বারো পাংকাল .....	১৯
৭।	রাজনীতির লক্ষ্য .....	২০
৮।	নেতাহীন জাতর দুঃখর কথা .....	২১
৯।	গণতন্ত্রত সংখ্যালঘু জাতর অস্তিত্ব রক্ষা .....	২২
১০।	রাজনীতিত ব্রহ্মাস্তদর্শী পুরুষর প্রয়োজনীয়তা .....	২৪
১১।	রাহু কেতু রাজনীতি .....	২৭
১২।	রাজনীতির মাধ্যমে স্বার্থ আদায় .....	২৮
১৩।	জিৎতা অনির পথ বিসারেয়া .....	৩০



## সাহিত্য বারো রাজনীতি রাজনীতির অচেৎপা তত্ত্ব

৯

বিশ্ববিখ্যাত ঐতিহাসিক আর্নল্ড টয়নবির উক্তি —

‘জিঙানি এহান দ্বিরকমর। সাময়িক সাফল্যর লগে যদি রাজনৈতিক জয় আকসাটে যুক্ত নার উহান অইলে ও জয় উহান প্রকৃত অর্থত অস্থায়ী।’

এরে উক্তি এহান বিবেচক দাপা আহানে এহানর তাৎপর্য আলোচনা করিয়া সিদ্ধান্ত নেছিলাগা। দ্বিতীয় বিশ্বযুদ্ধত হিটলারর লগে বৃটিশ প্রধানমন্ত্রী চার্চিলর পরাজয় অছিল। কিয়া বুঝে, যুদ্ধত হিটলার মুণ্ডামুণ্ডি পরাজয় বরণ করেছিল উতার লগে বৃটিশ পৃথিবী জুড়িয়া আছিল কলোনি উতা হাবি রক্ষা করে নুয়ারেছিল। জার্মান পূর্ব বারো পশ্চিম বুলিয়া দুহান রাষ্ট্র খেয়ছিল। কিন্তুমান কালর প্রভাবে দ্বিয়হান বারো তিলেলা কিন্তুমান বৃটিশর রাজ্য হাবি স্বাধীনতা পেইলা।

গীরকর অতি নু তত্ত্ব এহানে রাজনৈতিক প্রয়োজনীয়তা কতির চুয়া দরকার উহান প্রকাশ করে দেছে।

এবাকাতে রাজনীতির জয় এহান বুলতে কীহান হারপেয়ার। গণতন্ত্রর আগে আছিলতাই রাজতন্ত্র। ও রাজতন্ত্রর সময় রাজা এগয় যেহান স্বীকৃতি দিতে উহানেই রাজনীতির জয় বুলিয়া স্বীকার করলা।

যেমন খ্রীষ্টধর্ম এহান ইউরোপে পয়লা নাচলেছিল। প্রচারক এতা লুকা লুকা আছিল। কিন্তু যেবাকা খ্রীষ্টান প্রচারক এতাই রোম সম্রাট রাজা কনস্টান্টাইন গিরকরে বুঝেয়া তানুর ধর্মত ধর্মাস্তরিত করলা উপেইৎ দেশর প্রজা হাবি ও ধর্ম নিলাগা। ভারতে রাজা অশোকে বুদ্ধ ধর্ম গ্রহণ করানির থাংনাৎ হিন্দু ধর্ম বেলেয়া বুদ্ধ ধর্ম নিলাগা। ইসলাম ধর্মই কিন্তু তরোয়ালর সাহায্যলো মানুরে জোর করিয়া ধর্মাস্তরিত করেছিল। মণিপুর রাজ্যত রাজা গরীব নেওয়াজ বা পামহৈবা গীরকর সময়েউ রাজারে বৈষ্ণব ধর্মত দীক্ষিত করানির থাংনাত মণিপুরর মানু এতা রাজার মতে ধর্ম গ্রহণ করেছিল। রাজার শক্তি এহানরেই রাজনীতির শক্তিহান বুলিয়া লেপকরেছিল। গণতন্ত্র দেশে প্রবর্তন অইল উবাকা মানুয়ে তিলয়া যে নীতিহান লেপকরতাই উহানরে আতিয়ারহান করিয়া দেশ চালেইতাই। ও নীতিলো এবাকা যদি দেশে উগ্রবাদ দমন করতেগা শত শত উগ্রপন্থী মারলেউ সরকারে উতার দায় গ্রহণ না করের। কিন্তুমান সরকারর সৈন্য মরলে তানু হাবিতা সুবিধা পাযিতালাগা।

শ্রীলঙ্কাত তামিল এতাই কত বসর তানুর আলাদা রাজ্যের সালেদে যুদ্ধ করলা। কিন্তুমান প্রভাকরণর নেতৃত্বের সংগ্রাম সরকারে চূর্ণ করে দিল।

অন্যবারাদে মায়ান্মারর আরাকান প্রদেশে আছি রোহিঙ্গা মুসলমান এতারে নাগরিকত্ব নাদিয়া রাষ্ট্র সংঘের নির্দেশ পেয়া সরকারে য্যাকরানি নাকরের।

বিশ্বজুড়িয়া রাজনীতির ডাঙর অংশহান অইলতাই কূটনীতি। আমেরিকার সাদে বাঘ আগর কাদাত ছাগীগো পারা হুরকাঙ দেশ কিউবা সোভিয়েট রাশিয়ার কারণে টিকিয়া আছে।

চিয়াং কাইশেকর রাজ্য কুয়েমিনটাং চীন - মানে ফরমোজা দ্বীপ রাষ্ট্র সংঘের সদস্য আছিল। অথচ মূল-চীন সময় আহান ফাম নাপাছিল।

উত্তর ভিয়েতনামর স্বাধীনতা সংগ্রামী হো চি মীন গিরকর সংগ্রামী জীবনর ইতিহাস পাকরলে গতিহীন মানুর রকত তপ্তা অর। রাশিয়া বারো চীনের পরোক্ষ মদতে আমেরিকার কবলেঙ দেশহান স্বাধীন করেছিল।

এবাকা চীনে ভিয়েতনামর সাগর দ্বীপ উতাত তার প্রতিপত্তি বিস্তার করানিত খেঙছে। ভিয়েতনাম বাধ্য অয়া বারো আমেরিকার লগে মিত্রতাত যারগা। এতার নাং কূটনীতি।

গণতন্ত্রত হাবিস্ত ডাঙর অসুবিধা অইলতাই সংখ্যা যাত বা সংখ্যা লঘু জাত এহানর অবস্থান। ভোটাভূটি অইলতাই গণতন্ত্রর মাধ্যম। এ ভোটাভূটিত যেসাদেউ সংখ্যা নিয়াম জাত উতায় জিঙিয়া রাজনীতির ফল আদায় করানিত সমর্থ অইতারা।

হুরকাঙ মাছ এতা বোয়াল, পরম এতার খাদ্য। পছরী আগত বোয়াল থাইলে হুরকাঙ মাছ যেসাদে খেয়া হদেইতারা ঠিক উসাদে গণতন্ত্রত সংখ্যা গরিষ্ঠ জাতে সংখ্যা লঘিষ্ঠ জাতরে বিকল করিয়া থয়তারা।

ঔ কারণে সংখ্যা কম জাত এতা হিন্দী বা গঙিয়ার সাদে কাটাআলা মাছর রূপ ধরানি লাগের। পুঠি মাছর সাদে অইলেতে বিপদ আছে। গরুড় পুরানে নীতিমালার মাধ্যমে মাতেছিতা - সংসারে নিয়াম সরল অয়া চলানি থক নেই। জঙ্গলহানাত ইজু গাছ উতা নিয়াম ত্বরা করে ছেদেয়া লয়করতারা। কিন্তুমান কাটাআলা ডিগল ঘন গাছ উতা না ছেদেইতারা।

রামায়ণে পাতালে মহীরাবণ নিধন করানির লৌশিং এহান কতির রাজনীতির খেলাহান। হনুমান বাদরগ অইলেউ রাজনীতি কতির চৌখাত অছিল



দৃষ্টান্ত পেয়ার। রামচন্দ্রই হমা দেনার কায়দা হারনাপার হানতে দেহা দেনারকা হেইচা করল। মহীরানুগে হমা দিতে হনুমানে দৌর আতর থাংজাংহানলো বলী দিল। মানে মহীরাবণর হংকরা থাংজাং হানেই তারে মারল।

রাজনৈতিক ক্ষমতা নেয়নির সালেদে দ্বিতীয় বিশ্বযুদ্ধত হিটলারে ৬০ লক্ষ ইহুদীকে গ্যাস চেম্বারে বরেয়া মারেছিল। এহানর দীঘল ইতিহাস পাকরলে এ সংসারে মানু এতা কতি নিষ্ঠুর অনা পারতারা এহান প্রমাণ পেয়ার।

এবাকা ইজরাইল রাষ্ট্র হংকরাণির থাংনাং তানু রাজনৈতিক ক্ষমতাবান অইলা। অদ্য তানু ৭০ (সত্তর) লক্ষ জন সংখ্যার দেশহান অয়াউ ৪৬ কোটি মুসলিম রাষ্ট্রর মানুরে দাবেয়া থছি। এহানরে রাজনৈতিক ক্ষমতার নিদর্শন বুলতারাত।

ধর্মরমাউ রাজনৈতিক গংহান আছে। খৃষ্টান বারো ইসলাম দ্বিয় ধর্ম তত্ত্বরমা মূর্তি পূজক এহানরে নিঃশেষ করানি এহানেই বীজগো হংকরিয়া মূর্তি পূজক জাত উতা দাবেয়া থছি।

অসম, নাগালেণ্ড, মিজোরাম, অরুণাচল এসাদে রাজ্যর মানু এতা মাত্র ১০ লক্ষ জনসংখ্যার মানু অয়াউ ৬০ গো বিধায়কলো মন্ত্রী সভা গঠন করিয়া সুবিধা ভোগ করতারা। মানে বিধায়ক আগো অইতে ২০ হাজারর কম সংখ্যার এলাকার মানু অইলেউ চলের। এহানেই তানুর রাজনৈতিক সাফল্য।

ভারতবর্ষত ধর্ম চেতনাং মানু হমাদেনা, প্রেম, ভক্তি, শ্রদ্ধা এতাত বিভূলা অয়া পালন করতারা। তীর্থযাত্রা, কুস্তমেলা দর্শন, ধর্মসভা করতারা। কিন্তু বিধর্মী অয়া মানু এতারে ছাগীর সাদে তুপকরলা উপেইং দাবদে দাবদে লুকাছিলা। এহানর একমাত্র কারণ গীতার আদর্শ না-ইলয়া চলানি। ভগবান শ্রীকৃষ্ণই অর্জুনরে পয়লাই শিক্ষা দেছিল — ‘হে অর্জুন মুনীথকপা এহানতে নাবেলেইছ।’

রাজনীতিত রাষ্ট্রর পয়লাকার বর্মগো হিসাবে প্রতিরক্ষা বিভাগরে প্রাধান্য দেব। হরু জাত এতা রাজনীতিত নিয়াম সচেতন অনা লাগের।

এহানাং উল্লেখ আছে রাজনীতিত ক্ষমতা নেয়নির সালেদে চাক্কা জাত এহান নেহেরু গিরকর কলমগোর খোচা আহানাং ছিতারা দিল। এহানান্ত আমার জাত এহানে শিক্ষা নেনা থক্। একমাত্র বরাক বারো ত্রিপুরা ছাড়া আমার ফাম নির্ণয় করানির ফাম নেই। সরকাররাং আমারকা আলাদা রিজার্ভ সিট হংকরে দেনা লাগতই এহানেই আমার রাজনৈতিক জয়হান বুলিয়া নিংকরানি লাগের। ○

## সাহিত্য বারো রাজনীতি

সমগ্র পৃথিবী হাপদিয়া পয়লাকার সাহিত্যর বীজগো ছলকরেছিলাতাই এ পৃণ্যভূমি ভারতে। এ দেশর ঋষি মুনীর দিব্যজ্ঞানর পাঙলাকে সৃষ্টি অছিল ‘ঋক বেদ’। এ লেরিক এহানরেই পৃথিবীর পয়লাকার সৃষ্টিহান বুলিয়া প্রচার করেছিল গীরক উগোর নাঙ — প্রফেসার ম্যাক্সমুলার। ভারতর পণ্ডিত মণ্ডলীয়ে তারে ‘মুক্ষ মুলার’ বুলিয়া সম্বোধন করলা।

গীরক জার্মানগো অয়াউ ভারতর সংস্কৃত ভাষা এহানরে পৃথিবীরমা প্রচার করতে কতিহান তার জীবন উৎসর্গ করেছিল উহানর পানতামনা নেই বুন্নেউ ভুল নাইব। অক্সফোর্ড বিশ্ববিদ্যালয়ে প্রাচ্য ভাষার অধ্যাপকগো অয়া এ ‘ঋকবেদ’ গ্রন্থ এহান ভারতেন্ত ইংল্যান্ডে নিয়া পুরা ২৬ বৎসর এ লেরিক এহানর ইংরাজী ভাষাত অনুবাদ করিয়া পৃথিবীত প্রচার করেছিল। এরে লেরিক এহান গবেষণা-ছাপানির খরচ ইষ্ট ইণ্ডিয়া কোম্পানিয়ে বহন করেছিল। উহানেতে গুণী মানুরাং এরে গ্রন্থ এহান গুরুত্ব কতিহান অছিল উহান হারপেয়ার।

আরাকৌ আচানকর কথা। বিশ্ববিখ্যাত বিজ্ঞানর যাদুকর টমাস এলভা এডিসন গীরকে মানুর কণ্ঠস্বর এগো পয়লা তা রেকর্ডিং করিয়া উহানরে কীসাদে ভাষালো রূপ দেনা উহানরকা মেক্সমুলার গীরকর উপদেশ চাছিল।

মেক্সমুলার গীরকর উপদেশ মতো তা নিজে আমেরিকান্তপুরী অক্সফোর্ডে আয়া ঋক বেদর মন্ত্রলো পয়লা রেকর্ডিং করিয়া ইতিহাস রচনা করেছিল।

ঋক বেদর ফাম এহান পৃথিবীর ইতিহাসে কতিয়ৌ গজে আছে উহান গজর ইকরা কথা উহানির মাধ্যমে বৌ পেয়ার।

উহানেতে পৃথিবীর পয়লা সাহিত্যর অকরাগোত্ত রাজনীতির অবস্থান হারপেয়ার। ঋক বেদরমা পয়লা ডাঙর যুদ্ধর উল্লেখ আছে। উহানরে ‘দশ রাজার যুদ্ধ’ বুলিয়া পৃথিবীর পয়লাকার যুদ্ধহান হিসাবে মাতে গেছিগা। এরে দশ রাজার যুদ্ধত আকবেদে — সুদাস, অন্যবারাদে - ভারত, যদু, মৎস্য, অনু, দূহ্য এসাদে দশজাতর উল্লেখ আছে।

এ যুদ্ধত সুদাস রাজা, আকখুলাগর পক্ষে আছিলতাই বসিষ্ঠ ঋষি বাকী দশগোর পক্ষে আছিলতাই বিশ্বামিত্র ঋষি। যুদ্ধত সুদাস রাজাই দশ জাতিরে পরাস্ত করিয়া রাজা পালছিল। এরে যুদ্ধর রেবারেখির কারণে বিশ্বামিত্র ঋষি বসিষ্ঠর চিরশত্রু অছিল।



পৃথিবীর পয়লাকার লেরিকহানাতেই রাজনীতির গংহান পেয়ার। মাংতে গেলেগা মানু এতা পৃথিবীর অন্য জীবরাংত তঙাল জীব আক্তা। পৃথিবীত জরম অয়া ভোগ, ঐশ্বর্য্য, প্রতিপত্তি বিস্তার, অহঙ্কার, লোভ, কামনা, বাসনা এতা নানান বৃত্তি মানুরাং থাযারগা।

এতা এতার কারণে আগর লগে আগর প্রতিযোগীতা বা ফাংনা এহান পৃথিবীর নিকাকার রূপ আহান বুলিয়া য়াকরানি লাগতৈ। পৃথিবীত জরম অইলেই Positive বারো Negative দ্বি় শক্তির লগে হাবি সমইত মুঙা মত্তি অয়া ফাংনারমা মানু জিংতা অনা লাগের। এরে বেড়ী এহানান্ত কুনগৌ মুক্ত অনার উপায় নেই। উহানেতে হাবি ক্ষেত্রে ফাংনা এহানরকা হাবিহান হজাক অনা লাগের।

বেদর থাংনাৎ উপনিষদর যুগ উহানাৎ ঋষি মুনীয়ে তত্ত্ব জ্ঞানর মিঙালপা পথগো ইলকরেদিল। পৃথিবীর সত্যর শক্তিহান হারপেয়া — ‘সত্যমেব জয়তে’, আত্মজ্ঞানী অয়া নিজরে — ‘অমৃতস্য পুত্রাঃ’ বুলিয়া ভৌ পেয়লা। উপনিষদর যুগে মানুরে ধ্রুব তেরাগর সাদে নির্দেশ দিলা — যতউ যুদ্ধ কর, পরমব্রহ্ম যেগরে কৃপা করতৈ উগৈ সত্যপথগো পেইতৈ। সত্য এহান এমন বস্তুহান যেহান পয়লা পয়লা উপ নাইলেউ খামতলর জিঙানিতে সত্য থাযারগা। ঋষি মুনীয়ে ধ্যানর মাধ্যম হারপেয়া মাংলা — ব্রহ্ম সত্য — জগৎ মিথ্যা। উপনিষদ লেরিক এতার থাংনাৎ পুরাণর যুগ আহিল। পুরাণর যুগে নানান আখ্যান বা য়ারির মাধ্যমে মানুরে জ্ঞান রাজ্যর নানা বারাদে মিঙাল দেনার চেষ্টা করেছিল। উপেইৎ রাজধর্ম, গৃহস্থী ধর্ম, সংসার ধর্ম, ধনপয়সা অর্জন এতার নানান তত্ত্ব আলোচনা অছিল। মার্কণ্ডেয় পুরাণে রাণী মদালসার অখ্যান উহানেই নিয়াম গুরুত্ব পাছে। তেই জিপুত চারিগরে কীসাদে করে হংকরেছিলী উতার বিষদ বর্ণন আছে। তেই জিপুতরে রাজধর্ম, শাসন, গৃহস্থী এতালো নানান ভাবে শিক্ষা দেছে উতা খালেকরলে ডাকনী লাগের। মোটের উপর ও যুগে মানুরে পৃথিবীর ন্যায়-অন্যায়, পাপ-পুণ্য, সন্যাস মুক্তি এতালো মানুরে জাগ্রত করেছিল।

সাহিত্যর ডাঙর মঞ্চ আগো সৃষ্টি অইলতাই মহামুনী ব্যাস দেবর হাকতাকে। আজিস্ত প্রায় পাঁচ হাজার বৎসর আগে তার লেংকরা ‘মহাভারত’ পৃথিবীর শ্রেষ্ঠ মহাকাব্যরূপে স্বীকৃতি পাছিল। মহাভারতে নাপেইলতা কিতাউ নেই। ধর্ম, কর্ম, রাজনীতি, শাসন, নানান জ্ঞানর খৌনাঙ ঝাড় অয়া সাহিত্য জগতে সৃষ্টি অইল।

মহাভারতে কীহান শিক্ষাদের উহান খালকরিল কথা। মহাভারতে মানুষে দেহ্যাদের পথগো অইলতাই— মানু এতা যতৌ জ্ঞান লৌশিং ধার্মিক অকা কিন্তুমান সংসার ক্ষেত্রত চলতে গেলেগা রাজনীতি করানিয়ে লাগের। রাজনীতি নিজর অস্তিত্ব জিৎতা করানির পথ আগো। হনারী এগৈ হনালো অলঙ্কার হঙকরতে যেসাদে হনার লগে খাদ বরানি লাগের। এ খাদ বা তামা এতা নইলে অলঙ্কার না হঙর। ঠিক উসাদে এ সংসার চক্রত রাজনীতি নইলে নিজর বারো দেশর অস্তিত্ব বিপন্ন অর। ঔ কারণে ধর্ম, কর্মর লগে রাজনীতির দরকার পড়ের। মহাভারতর সাবিত্রী সত্যবান উপাখ্যানে সাবিত্রীর সতীত্বর শক্তি বর্ণনা করেছি। কিন্তুমান সাবিত্রী গিথানক ডাঙর রাজনীতিবিদ আগো আছিলি। যমরাজা গীরকে সাবিত্রীরে মাতেছিলতাই — সত্যবান জিৎতা অনি ছাড়া যে কোন বর চা - দিতৌ। সাবিত্রী ঔ সুযোগে হৌরকর অন্ধত্ব, রাজ্য লাভ এতা বর আদায় করেছিলি। খামতলে শত পুত্র পেইঙ বুলিয়া বর মাগেছিলি। যমরাজা গীরক শতপুত্র পেইয়া যাক্গা বুলিয়া বরহান দিল। সাবিত্রী বারো যম রাজার অনুগামী অইলি। যমরাজাই তেইরে খামতল বরহান দেনা সন্তেউ কীয়া আলথক নইরী এহান আংকরলো।

সাবিত্রী গিথানকে মেঙয়া মাংলো — হে যমরাজা গীরক মোরেতে শতপুত্র বরহান দিলে কিন্তুমান মোর স্বামী গীরকরেতে না এরাডিলে হান্তে কীসাদেতে শৌ পেইতৌতা? কথাহান হনানীর লগে যমরাজা গীরক ফিঙইল। তা সাবিত্রীর লৌশিং উপয়া সত্যবানর ঠৈগো ফিরাদিতে বাধ্য অইল। ঔ কারণে সাবিত্রী বেয়াপাগো অনা সন্তেউ ঔ যুগে কতিহান রাজনীতিত চৌখাত অছিলি উহানর প্রমাণ পেয়ার।

মহাভারত এহান রাজনীতির চরম শিক্ষার গ্রন্থ আহান। সমুদ্র মন্ত্ৰনে হিনচাপা দৌ তিলয়া অমৃত নিকালাছিল। উপেইং বিষ্ণুরে মোহিনী রূপ ধরিয়া অমৃত হাবি দৌরে খৌবেয়া অমর করেছিল এহানেই ডাঙর রাজনীতিহান। হিনচাপা এতাতে নিয়াম পাঙকালপাতা। এতাই অমৃত পিয়া অমর অইলেতে দৌর অস্তিত্ব বিপন্ন অইতৌ বুলিয়া বিষ্ণুরে রাহুর গারগো তুপ করিয়া দ্বিভাগ করেছিল বারো অমৃত পিনান্ত বঞ্চিত করেছিল। ধর্মমতে হিনচাপা বারো দৌ দ্বিত্যতাই তিলয়া অমৃত পানা এহান থকছিল এহান বিচারর কথাহান। কিন্তুমান দৌবে পিয়া অমরত্ব পেইলা হিনচাপাই লৌ দিয়া থাইলা। এ তত্ত্ব এহানেই রাজনীতির আচেংপা মন্ত্ৰহান। পরাক্রমী রাজা হিসাবে জুলিয়াস সিজার বারো গ্রীক বীর আলেকজান্ডার গীরকর নাঙ পৃথিবী জুড়িয়া আছে। জুলিয়াস সিজারর দেশ বিজয়র তিনহান বাক্য জগৎ



জুড়িয়া প্রচার আছে — গেলুগা, দেখলুগা, আনলুগা — ভিনি, ভিসি, ভিডি। রাজ্য জয় এহান তারাং সাধারণহান অছিল।

হাজার বসর আগেকার রোমান রাজা জুলিয়াস সিজারর গজে উইলিয়ম সেক্সপীয়র গিরক তার জীবন নাট্য অনুসরণ করিয়া বিখ্যাত নাটক ‘জুলিয়াস সিজার’ রচনা করেছিল। ঐ নাটকে সিজারর পরম বন্ধু ব্রুটাসে যেবাকা তারে ছরিহানলো মারানিত উবা অছিল উপেইং সিজারর শেষ বাক্যহান — ব্রুটাস তি - (ব্রুটাস ইউ টু....) বিশ্বাসঘাতকতার চরম ছবিহান। থাংনাং জুলিয়াস সিজারর দেহগো মুঙে থয়া দেশবাসীরাং হত্যাকারী ব্রুটাস সিজাররে মারানির উদ্দেশ্য ব্যাখ্যা করলো উপেইং রাজ্যবাসীয়ে হারো অয়া — ‘ব্রুটাস দীর্ঘজীবি অক’ বুলিয়া লৌদিল। ব্রুটাস মঞ্চগো এরা দিয়া মার্ক এন্টনী গীরকরাং পিছেকার বক্তব্য থনার হেইচা করেছিল।

ঐ মঞ্চ উগং থয়া মার্ক এন্টনী গীরকে যে বক্তব্য থছিল উহান পৃথিবীর রাজনীতির ইতিহাসে হনার অক্ষরলো ইকরিয়া আছে। মার্ক এন্টনী এমন বুদ্ধিলো বক্তব্য প্রকাশ করেছিল যে কথার মাধ্যম রোমর জনগণ ব্রুটাসর বিরুদ্ধে উবা অছিল। মার্ক এন্টনীর দলহানে ব্রুটাসরে পরাজিত করিয়া জুলিয়াস সিজাররে বীরপুরুষ হিসাবে প্রতিষ্ঠা করেছিল। পুরানা কাহিনী এহানরে সেক্সপীয়র যে কৌশলে নাটকর মাধ্যমে রাজনীতির ছবিহান লেঙ করেছিল উহান আজি পেয়া সাহিত্য জগতে মিঙাল দিয়া আছে।

রাজনীতির ব্যাপারে বিশ্ববিখ্যাত লেখক আরনলড টয়নবি (Arnold Toynbee) তার ‘পৃথিবীর ইতিহাস’ লেরিক হানাত ভারতর বিষয়ে ইকরতে যে মন্তব্য করেছিল উহান রাজনৈতিক স্তরে নিয়াম মূল্যবান। আকবর বারো ঔরঙ্গজেব দ্বয়গীর বিষয়ে মন্তব্য করেছিল। তার মতে হিন্দু জাত এহান নিজর স্বকীয়ত্ব পাহরানীর কারণহান অইলতাই আকবরর উদার ধর্মনীতি — হিন্দু-মুসলমান সংভাব অয়া চললা। সংঘাত নেয়ছিল।

অন্যবারাদে সম্রাট ঔরঙ্গজেব হিন্দুর গজে অত্যাচার, হিন্দুর গজে জিজিয়া কর, হিন্দুর মন্দির ধ্বংস এতা কিতার মাধ্যম হিন্দুর আলাদা জাগরণ অনাং খৌতাল দেছিল। তার রাজত্বর সময়েই শিবাজী জরম অয়া পয়লা হিন্দু রাষ্ট্র হংকরেছিল।

থাংনাং হাতে হাতে মোগল রাজত্বর পতন অছিল। ঐ কারণে। হিন্দুর উত্থানে ঔরঙ্গজেবর অবদান হাবির গজে।

রাজনীতি এহান অতি কুটিল বারো চক্রান্তময় জিনিষহান। সাধারণ সরল মানুহাং এতা অগম্য বুলে পারিয়ার। বৃটিশ এতাই ভারত এগো কীসাদে নিলাগা এহান যুক্তিবাদীয়ে মাৎলাতা— পয়লা বৃটিশ এতা বাইবেল আতে করিয়া আহিলা।

দ্বিতীয়ে মদ বিলাদেনা অকরলা।

তৃতীয়ে - বন্দুক আনিয়া দেশহান নিলাগা। ভারতে ইস্ট ইন্ডিয়া কোম্পানীর সাধারণ কেরানী লর্ড ক্লাইভ গিরক আক্খুলাগর কুট চালে সমগ্র ভারত বৃটিশ অধিকারে গেলগা। এহানান্ত হিকিলতা দলাগো আছে। ○

## রাজনীতিত উদারতা বারো কঠোরতা

ভারতবর্ষর ইতিহাস তাম করলে দেহিয়ার যে দিল্লীর রাজা পৃথ্বীরাজ চৌহান গীরকর লগে মোহাম্মদ ঘোরীর যুদ্ধর ঘটনা। পৃথ্বীরাজর ঘোর শত্রু জয়চাদর পরামর্শ ক্রমে মোহাম্মদ ঘোরী দিল্লী আক্রমণ করেছিল। যুদ্ধত ঘোরী পরাজিত অয়া প্রাণ ভিক্ষা করেছিল। পৃথ্বীরাজে প্রার্থনা মঞ্জুর করিয়া ঠইগো দিল। কিন্তুমান ঔদিন যদি পৃথ্বীরাজ মোহাম্মদ ঘোরীরে বিনাশ করে দিলেই ভারতর ইতিহাসর চাকা অন্যবারাদে বুলনদিল ঐছ। মানে ভারতে মুসলমান রাজত্ব সম্ভব নাছিল। সুলতান মামুদ গুজরাটর ঐতিহাসিক সোমনাথ মন্দির ধ্বংস করেছিল। ভারতর ইতিহাসে এহানর তথ্য নানা ভাবে ইকরা আছে। কিন্তুমান বেদবিদ্ দয়ানন্দ সরস্বতী গীরকর ইকরা ‘সত্যার্থ প্রকাশ’ গ্রন্থ পাকরলে আরাক তথ্য আহান পেয়ার।

মূলত গুজরাটর রাজার যে সৈন্যবল আছিল উতালো সুলতান মামুদর দশহাজার সৈন্যরে পরাজয় করানিত সামর্থ্য অছিল। কিন্তুমান মন্দিরর পুরোহিত এতাই রাজারে নানান ভাওতা দিয়া যুদ্ধ করানিত্ত বিরত করেছিল। যার কারণে খাংখা মন্দির আক্রমণ করিয়া মন্দিরগো ধ্বংস করিয়া ৮০ মন ছনা নানা রত্ন লুট করেছিল।

ভারতবর্ষর বামুণ বারো পুরোহিত এতার দুর্বল চরিত্র ক্ষত্রিয় ভাবর অভাবর কারণে ভারতর হিন্দু জাত এহান বিদেশীরাং বার বার অত্যাচারিত অছিল। বামুন এতার নিজর স্বার্থ পুরণর সালেদে কঠিন কাম এতান্ত সেচানির কারণে বা রাজনৈতিক অদূরদর্শিতার কারণে দুঃখময় অবস্থিতির সৃষ্টি অছিল। ○



## মারুপানা বা বন্ধুত্ব

এককভাবে রাজনীতিতে বহু দুর্বলতা থাকে। ঔহান পুরণর সালেদে অন্য পক্ষর সাহায্য লাগের। রাজনীতিতে এহান অদ্যকার ডাঙর পরিবেশ আহান। এরে বন্ধু শব্দ এগর চারিহান রূপ সাহিত্য জগতে নিরূপিত আছে — ১। বন্ধু ২। সুহৃদ ৩। সখা ৪। মিত্র।

বন্ধু এগো চিয়ৌপা সময়ে থাইতেউ পারে নাথাইতেউ পারে।

সুহৃদ এগো কিন্তু পুরাপুরি বিশ্বাসর লগরগো। যেমন কৃষ্ণর সুহৃদ অর্জুন। রাজনৈতিক স্তরে সোভিয়েট রাশিয়া ভারতর বিপদর দিনে — কাশ্মীর সমস্যা বারো বাংলাদেশ যুদ্ধত — মুক্তামুণ্ডি সমর্থন দিয়া সুহৃদর ভূমিকা নেছিলগা।

সখা এতা অইলাতাই ন্যায়-অন্যায় বিবেচনা নাকরিয়া আবেগে দল বা মানু আগরে যাকরিয়া চলানি।

মিত্র অইলতাই নিজ নিজ স্বার্থে কতগো এক অয়া আক্রমণ কারিবে প্রতিহত করিয়া জয় অনার লক্ষ্যে কাম করানি। এহানর উদাহরণ অইলতাই — দ্বিতীয় বিশ্বযুদ্ধত জার্মানির বিরুদ্ধে আমেরিকা, বৃটেন বারো রাশিয়া মিত্র জোট বাধিয়া জার্মানির হিটলার গীরকরে পতন করানির ঘটনাহান।

অন্যবারাদে মধ্যপ্রাচ্যত আমেরিকায় ইজরাইল রাষ্ট্ররে সমর্থন দিয়া মধ্যপ্রাচ্যত আমেরিকার শক্তিরে জিৎতা করিয়া থনা। যেহানর কারণে ইজরাইল বারো পালেষ্টাইন রাষ্ট্র দ্বিয়হানির ক্ষমতার যুদ্ধ এবাকাউ চলিয়া আছে।

ভারত বারো চীনর বন্ধুত্বর নমুনা দেহিয়া শিক্ষা নেনা থক্। ভারতে চীনরে রাষ্ট্রসংঘত যৌকরানির অনেক চেষ্টা করিয়া সফল অছিল। থাংনাত তিব্বতরে জোর করিয়া চীন তার রাজ্যত অন্তর্ভুক্ত করেছিল উপেইং ও অন্তর্ভুক্তিরে ভারতে স্বীকার করেছিল। কিন্তুমান চীন থাংথা ভারত আক্রমণ করিয়া অনেক সীমানা তার রাজ্যর ভিতরে বরেয়া থইল উতার লগে অরুণাচল প্রদেশ তার ম্যাপগত বরেয়া ভারতরে চাপেয়া থছে। এহানৌ মারুপানার নমুনা আহান।

সখার নমুনা অইলতাই চীন কমিনিউষ্ট রাষ্ট্র আহান; এতার সখা অইলাতাই ভারতর কমিনিউষ্ট দল। চীন যেবাকা ভারত আক্রমণ করেছিল উপেইং তানু নীরব অছিল।

মানু এতা ডাক্তরগরাং রোগী, গাড়ীর মালিকরাং-যাত্রী, বেপারীরাং-গ্রাহক। ঠিক উসাদে রাজনীতিবিদরাং-ভোটর। কোন কোন ভোটরর মাধ্যম তা জয়ী অইতে

এহানেই তার চরম খেলাহান। ঔ কারণে তারতা একশ শতাংশর চিন্তা না করিয়া পঞ্চাশ শতাংশর চিন্তা করিয়া কামে আওয়ানি লাগের।

রাজনীতিত বাহিরে আহান ভিতরে আহান থয়া চলানি লাগের। হাবিতা প্রকাশ করলে রাজনীতি দুর্বল অর। ঔ কারণে প্রতি দেশে গুপ্ত পুলিশ বাধ্যহান। আমেরিকার সি, আই, এ পৃথিবী হাপদিয়া জাল বিস্তার করিয়া রাষ্ট্রগোরে পাহাড়া দিয়া থছে। এহান রাজনীতির নিগেটিভ অংশ আহান। ○

## রাজধর্ম বারো রাজনীতি

গণতন্ত্র পৃথিবীত চালু অনার আগে রাজা এতাই দেশর সর্বের সর্বা অছিল। রাজা তার ইচ্ছামত রাজ্য পরিচালনা করলো। রাজারে ভগবানর অংশ আগো নিঙকরিয়া পূজা দিলা। উপেইং সংখ্যাগরিষ্ঠ সংখ্যা বা লঘিষ্ঠ এহান নেয়ছিল। ভারতবর্ষত রাজধর্ম বিষয়ে ‘মনু সংহিতা’ বারো অন্যান্য পুরাণ আদিত এতার দীঘল আলোচনা অছে। কিন্তুমান যুগর পরিবর্তনে রাজতন্ত্র উচ্ছেদ অইলেউ ‘রাজ’ শব্দ এগতে সমান অছে। ঔ কারণে গণনীতি নায়া এবাকাউ রাজনীতি শব্দ এগো মিমুত নাছে।

ভারতবর্ষর গণতন্ত্রত তঙাল তঙাল জাতর অস্তিত্ব থা গেলেগাউ আমার সাদে হরুকাং জাত এতার অস্তিত্ব বিপন্ন অইতে বাধ্য। কিয়াবুলে সংখ্যা গরিষ্ঠ জাত এতাই চিরকাল দাবেয়া থাইতাই। যে জাতর প্রতিনিধিত্ব নেই ঔ জাত উতার দাবী আদায় অতি চিল।

আমেরিকার অতি সংখ্যা কম বারো আদিম অধিবাসী রেড ইন্ডিয়ান এতার বর্তমান ইতিহাস পাকরলে দেহিয়ার যে তানু এবাকা নিয়াম নির্যাতিত জাতি। বহু বিদেশী জাতর অনুপ্রবেশর ফলে তানু সংখ্যা গরিষ্ঠতা হারেইলা। এ অবস্থা ঠিক অস্ট্রেলিয়া মহাদেশেউ অছেহান। অস্ট্রেলিয়া বিদেশীর কলোনীগো অয়া, অছে ঔপেইর অধিবাসীর অস্তিত্বহীন। রাজতন্ত্র বারো গণতন্ত্রর হবাদিক বারো হবা নেই দিক বিষয়ে চিত্রআহান ধরানি অইল। ○



## ধন বারো পাংকাল

রাজনীতিতে প্রয়োজনে শক্তির দরকার অল্প। সংস্কৃতিতে কথাআহান আছে— ‘বীরভোগ্যা বসুন্ধরা’। মানে পাংকালপারকাই এ পৃথিবী এহান। কথাহান নাঐহান নাগে। এপেইং শক্তি এহানরে ধর্মীয় শক্তি বুলানি য়াকরের। যেবাকা অধর্মীয় এতায় পাংকালহীন এতারে অত্যাচার করতাই উপেইং ধর্মীয় শক্তি এতাই অত্যাচারকারীকে দমন করিয়া দেশ শাসন করতাই উপেইং ওঁ দল বা নেতৃত্বকারী উতারে বীর বুলতারাত। সাধারণভাবে মানু আগৈ মানু আগ মারলে উগরে হত্যাকারী বুলিয়া জেল নাইলে ফাসি দিতারা। কিন্তুমান রাজনীতির পক্ষে, মানে যুদ্ধ যেবাকা প্রয়োজন অর উপেইং সেনাপতি আগৈ যুদ্ধত হাজার হাজার মানু মারিয়া দেশ জয় করলে তারে বীরগো বা মুনীথকপাগো বুলিয়া দেশবাসীয়ে পূজা দিতারা; কবি লেখকে তার নাঙে স্তুতি লেংকরতারা এলাদেকুরায় এলা দিতারা। ওঁ কারণে মানু আগো মারলে হত্যাকারী হাজারগো মারলে বীর।

ভারত বাংলাদেশ (পূর্ব পাকিস্তান) যুদ্ধত ভারতর জেনারেল মানেকশা গীরকরে বারো লেঃ জেনারেল অরোরা গীরকরে সমগ্র দেশর সরকার বারো জন সাধারণে তানুরে কতিহান সম্মান দেছিল। উহান নিংশিং অইলে এ কথা এহানর অর্থহান নিকুলের।

এ বিষয়ে নাগারাজ্যর কংগ্রেস আমলর বিধানসভা ভোটর চিত্র নাট্য আহান অছিল। রাজ্যর বিধানসভা নির্বাচনে যতগো কংগ্রেস নমিনেশন দেছিল। উতার বিরুদ্ধে কোন আগৈ নমিনেশন নাদানির কারণে হাবি সিটে বিনা ইলেকসনে তানু জয় অছিল।

বিষয় এহানাত ধন পয়সা বারো অন্যান্য শক্তির প্রচ্ছন্ন মদত আহান থানার ইঙ্গিত পেয়ার। ○

## সাহিত্য বারো রাজনীতি রাজনীতির লক্ষ্য

মেকুর এগরে চিংগকরে গজেস্ত মাটিত বেলেউ তা ঠেং চারিহানলো বেলেস্ত থয়া পড়ের। এরে এহান মেকুর আগর ডাঙর গুণহান। ঠিক উসাদে রাজনীতির মূল লক্ষ্যহান অইলতাই জিঙানি। এরে জিঙানি এহানাং ফৌঅইতে যেতা যেতা লৌশিং, দক্ষতা, ভেদ নীতি, অর্থবল, বাহুবল এতা কিতা যত রণনীতি এতা রাজনীতির আতিয়ার স্বরূপ।

এতাত ধর্মনীতির য়ারি নেই। উহানে রাজনীতিরে কুটনীতি বুলতারা। ও কারণে শকুনি, চানক্য গীরক গাছি এতা কুটনীতির প্রদর্শক আকেইগী হিসাবে গণ্য অছি। রাজনীতিত - পক্ষ বারো বিপক্ষ দুহান ভাগ থার। বিপক্ষ এতারে শত্রু বুলিয়াউ মান্তারা। এরে মনোভাব এহানরে লক্ষ্য করিয়াই রাজনীতিত লামানি লাগের।

বক্ষিমচন্দ্র গীরকে রাজনীতি এহানরে দুহান ভাগে ভাগ করেছে — ১। বলডার নীতি ২। কুকুর নীতি। বলডার নীতি অইলতাই জোর করিয়া বেড় বাগিয়া আগর ক্ষেতির ফসল খেইতেগা মালিক পক্ষই প্রতিরোধ করলে হিংগীলো উগরে আক্রমণ করিয়া উগরে সেচেয়া ফসল ভোগ করানি।

কুকুরর রাজনীতি অইলতাই প্রভুর ইচ্ছার গজে যেতা পেইতেই এতালো হারৌ অয়া লেজগো লড়েয়া তার জাঙে পড়িয়া থানা। উতার ব্যতিক্রম অইলে মালিকগৈ জাঙদাল দিয়া তারে নিকাল দিতৈ।

নাগাল্যাণ্ডর ফিজো বারো মিজোরামর লালডেঙ্গা বলডার নীতির প্রয়োগ করেছিল। তানু অত্যাচারিও অইলেউ তানুর উদ্দেশ্য সফল করেছিল।

মূলত রাজনীতিত আগরে আগৈ দাবেয়া বা ক্রিয়াহীন করিয়া ক্ষমতা ভোগ করানি এহানেই লক্ষ্যহান। শত্রুর পক্ষ পালকা, গালকা, উন্নতি অকা কোনদিন নামনেইতারা। ○



## নেতাহীন জাতর দুঃখর কথা

মাউন্ট ব্যাটেনর পরিকল্পনা অনুযায়ী যেবাকা বাংলা বারো পাঞ্জাব খেইকরানির সিদ্ধান্ত গৃহীত অইল, উপেইং দ্বিয় রাজ্যর সীমানা নির্ধারণর সালে ব্যারিস্টার রেডক্রিফর নেতৃত্বত চারিগো সদস্যর কমিশন আহান হঙছিল। কমিশনর দায়িত্ব আছিলতাই ভৌগলিক বারাদেস্ত মুসলমান সংখ্যা গরিষ্ঠ অঞ্চলগোর সীমানা নির্ধারণ করানি। উচিত অছিলতাই সংখ্যাগরিষ্ঠ মুসলমানর এলাকালো পূর্ব পাকিস্থান সীমা লেপকরানি। কিন্তু কামহান উল্টা অছিল।

ঔ সময়কার বাংলার চট্টগ্রাম ডিভিশনর ৪ গো জেলারমা একমাত্র পার্বত্য চট্টগ্রাম জিলার মোট জনসংখ্যার মাত্র ৩ শতাংশ অছিলতাই মুসলমান। বাকী ৯৭ শতাংশর ৯৫ শতাংশ অছিলতাই বৌদ্ধ ধর্মলম্বী চাকমা জাতি। ঔ কারণে মুসলমান সংখ্যাগরিষ্ঠ না অনির কারণে উহান পাকিস্থানে হমানির কোন প্রয়োজন নেয়ছিল। মানে কমিশনর এস্তিয়ারে নেয়ছিল।

কিন্তু ১৯৪৭ ইংরেজীর ১৭ই আগস্ট মাউন্টব্যাটেনে যেবাকা সিমান্ত কমিশনর রিপোর্ট কংগ্রেস নেতারাং তুলিয়া ধরল উবাকা হারপেইলা চট্টগ্রাম পার্বত্য জেলারে পাকিস্থানর অন্তর্ভুক্ত করিয়া হদাছে। উপেইং সর্দার বল্লভ ভাই প্যাটেলে এহান তীব্র আপত্তি তুলেছিল, কিন্তু নেহেরুর সিদ্ধান্তর বিরুদ্ধে কিশ্তাউ করে নারল। উতার থাংনাং চট্টগ্রামেস্ত পুরী চাকমা নেতা দল আহান দিল্লীত নেহেরুর লগে সাক্ষাৎ করাং গেছিলাগা। নেহেরু তানুর লগে দেহা করানিউ নাকরল।

রাজনীতি এতা কতি মারাত্মক এ ঘটনা এহান লু করে খালকরলে হারপেয়ার। মানু আগর ইচ্ছায় কতিহান পেয়া জাত আহানরে বিপর্যায় অবস্থাত বেলাদেনা পারের এহানর ইতিহাস হারপেয়া থানা থক্। এতার থাংনাং চট্টগ্রামর চাকমা এতারে নানান ঠাইত থয়া অরুণাচলে বসতি দিয়া কতি লাংনা অছিল বারো এবাকাউ অছি।

ঔ কারণে যে জাতিত রাজনৈতিক চেতনা নেয়র বারো নেতা নেয়েতারা ঔ জাতি মৃত্যুবৎ অয়া থাইতারা।

নুরারা আগো স্ট্রোক্ অইলে যে কোমায় আচ্ছন্ন অর ঠিক উসাদে লক্ষ্যভ্রষ্ট নৌগর সাদে জাত আকেইহানর গতি অর। ○

## গণতন্ত্রত সংখ্যালঘু জাতের অস্তিত্ব রক্ষা

পৃথিবী জুড়িয়া নানান দেশের মানুষ নানান দেশে গিয়া বসতি স্থাপন করতারা। এহান আদিতে এবাকা পেয়াউ চলেছেহান। এতার হাদিত আদি বাসিন্দা সংখ্যালঘু অয়া মিমুত অয়া যিতারাগা। আমার নিজর রাজ্য কাছাড়। কাছাড়ীর রাজত্ব আছিল। আমার আহিত দেখতে দেখতে বাঙালী, মুসলমান বা হিন্দিভাষীর রাজ্যহান অইল। কাছাড়ীর অস্তিত্ব নেয়ইল।

ঠিক উসাদে আসাম রাজ্য এহানর আদিম জনজাতি বড়ো, কাছাড়ী এতা। কিন্তু থাইলেণ্ডর টাই জাত এহানে আসাম জয় করিয়া রাজত্ব করলা। প্রশান্ত মহাসাগর দ্বীপ আগর নাঙ ফিজি, ঔ দ্বীপ উগত ভারতর মানুষ গিয়া বসতি অয়া ঔপেইর আদি বাসিন্দারাংত সংখ্যা নিয়াম অইলা। উতার থাংনাং ভোটে জিঙিয়া মহেন্দ্র চৌধুরী বুলিয়া ভারতর গীরক আগৈ দেশর প্রধানগো অইল। উতার থাংনাং ঔ দেশর স্থায়ী বাসিন্দাই বিপ্লব করিয়া সংবিধান বদলেয়া স্থায়ী বাসিন্দা ছাড়া রাষ্ট্র প্রধানর পথ অন্যতারাং যানা বন্ধ অইল।

রাজনীতিত বানুক বারো গাছর ডাটাগোর য়ারি এহান হাবি সমইত নিংশিং অনি থক্। বানুকহানে গাছ ঝারিরাং ডাটা আগরকা হেইচা করেছিল। গাছ এজারিয়ে বানা পেয়া ডাটা আগো দিয়া দিল। ডাটাগো বানুকহানার ছিদ্রগো ভেদ করিয়া পূর্ণতা পানার লগে লগে ঠৈগো পালৈল।

যেবাকা বানুকহানে মূল গাছ ঔজারির গুরিগং ছেদহান বেগ্ন ঔপেইং মূল গাছ উজারে আংকরলো — ‘তিতে এহানতে কীয়া কররতা?’ ঔপেই জোবাবহান আহিলতাই — ‘তোরাংত ডাটাগো পেইলু আর ছেদাউরিতা।’

রাজনীতিত পররে আশ্রয় দিলে কীহান অর এতা কিতার উপমা দিয়া শিক্ষা দেনা লাগের।

গণতন্ত্রত সংখ্যা কম জাত এতা নিয়াম শিঙনি লাগের। তানুর বিপদ পদে পদে। বাহিরা শক্তিয়ে আমারে আমারে ভেদ বুদ্ধিলো লাগাদিয়া তানু ফয়দা লুটতারা। আসাম রাজ্যত বিষ্ণুপ্রিয়া মণিপুরী, মেইতেই মণিপুরী, কাছাড়ী বারো অন্যান্য ত্রিপুরা, রিয়াং, খাসি এসাদে হুককাং জাত এতা একমাত্র বরাক উপত্যকা মানে আগর কাছাড় রাজ্যর সীমাবদ্ধ রাজ্য আহানর বাসিন্দা।



এরে রাজ্য এহান ছাড়া বিষ্ণুপ্রিয়া বারো মেইতেইরতা আসামে কোন ফামে সংখ্যা থানা না নাথানির সমান। উহানেতে এরে দ্বিজাতিরতা বরাকে তানুর অস্তিত্ব রক্ষা করাণীয়েই লাগের। অন্যথা জাতর ভবিষ্যত আধার অইতে বাধ্য।

মূলত এবাকা বরাক উপত্যকা বাঙালী হিন্দু, হিন্দিভাষী বারো মুসলমান এরে তিন সম্প্রদায়র মানু নিয়াম অনির কারণে এরে তিন সম্প্রদায়র মানুই রাজনীতির প্রধান ভূমিকা নিতারাগা। উতারমা করিমগঞ্জ বারো হাইলান্দিরমা মুসলমান অর্দেকর গজে অয়া তানুর ফাম প্রায় পাক্কা করিয়া হদেইলা। বাকী কাছাড়গৌ প্রায় তানুর আশ্রাসনে আছি।

এ অবস্থাত বিষ্ণুপ্রিয়া বারো মেইতেই জাত দ্বিহানর বসতি এতারে অন্যজাতর রাজনীতি বিদ এতাই এলাকা এতারে খণ্ড খণ্ড করে আরার এলাকার লগে তিলকরিয়া একেবারে অস্তিত্ব নেইকরানিত লাগেছি। বিধানসভাতে থাক্ গাও পঞ্চায়েত পেয়া জিঙানীর আশা কম।

উতারমা বাঙ্গালী হিন্দু এতা হাবি বারাদে অষ্টোপাসগর সাদে হাবি বারাদেস্ত শিকার করানিত লাগেছি। কংগ্রেস, বিজেপী, সিপিএম, ইউডিএফ হাবি দলে তানু আছি। কোন আগরে পদ দেনা না মনেইতারা। এতা ছাড়া আইন মারফিক অবিসি, সিডিউল কাস্ট রিজারবেশন এতালো পদ দখল করতারা। রাজনীতিত বিষ্ণুপ্রিয়া মণিপুরী এতা আহকা বারো ফাম পাকা এতা কোন জাত আহানে নামনেইতারা। এহান রাজনীতির ধর্মহান ঔহানে অন্যান্য আদি বাসিন্দা এক অয়া সংগ্রাম করানি লাগতৈ। প্রয়োজনে সংবিধান সংশোধন করানি লাগতৈ। রাষ্ট্রসঙ্ঘত পৃথিবীর হাবিদেস্ত যোগদান করতারা। উপেইং জনসংখ্যার কথা না উঠের। এমনকি মাত্র এক লক্ষ অধিবাসীর দেশ ভেটিকান সিটি রাষ্ট্রসঙ্ঘর সদস্য আগো অয়া আছে।

ভারতবর্ষর যত প্রদেশ এতা ভাষা ভিত্তিক খেইয়ছেতা ঔ কারণে হাবি ভাষার মানু প্রতি প্রদেশে ফাম পানা থক্।

এবাকা নানান দেশর মানুর অনুপ্রবেশর ফলে আমার ভৌগলিক এলাকা সংকুচিত অয়া যারগা। এতা সরকারে বিবেচনা করতে বাধ্য। প্রয়োজনে ভোট বয়কট করিয়া মানুরে হজাক করিয়া আন্দোলন করানি লাগতৈ। বরাক উপত্যকার বিষ্ণুপ্রিয়া, মেইতেই, কাছাড়ী বারো অন্যান্য জাতি এক জোট অয়া ভোট বয়কট

করলে কাছাড়গোর হাওয়া পরিবর্তন অইতে বাধ্য। হাবির গজে আদি বাসিন্দালো এলাকা নুৰা করে হংকরানী। আদি বাসিন্দার সংখ্যা কম করিয়া এলাকা হংকরানীর দাবী তুলানি।

ত্রিপুরা, নাগাল্যান্ড বারো মিজোরাম এতার অতি কম সংখ্যালো ৬০ হান সিট হওয়া থার। বরাকর অবস্থাত আদি বাসিন্দায় এসাদে কম সংখ্যার ভোটের দাবী তুলানি।

এবাকার পৃথিবী এহানাত বয়া থাইলে না চলতৈ। নিজ নিজ দাবী সরকাররাং তুলিয়া ধরানি, ন্যায্য দাবী তুলানিত হাংকৈ অনির কারণ নেই। নিজর ডাকগো নিজে হংকরিয়া নিজে বাজানি লাগের। পরর মানু আয়া নিজর ডাকগো কোনদিন না বাজাদিতাই। এরে মহা সত্য এহান মুঙে থয়া সমাজর মানু আগুয়ান অনা লাগের।

জাত আহানর অস্তিত্ব জিংতা করতে আত্মত্যাগ প্রয়োজন। যে সমাজর ধনী বা রূপাআলা যদি আটকুরা অইতারা — বুদ্ধিজীবী যদি লেইরা অইতারা, শিক্ষাবিদ যদি হুদা চাকুরীমুখী অইতারা — রাজনীতিবিদ যদি খলেই ধরেকুরা অইতারা, উহান অইলেতে জাত উহানতে কোংগৈ জিংতা করতৈ? এরে সত্য এহান সমাজ-নিংপা হাবিয়ে খালকরানি থক। যে সমাজে মানু জরম অইতারা ও সমাজ উহানরে সম্মান করানি থক। সমাজ জিংতা অইলে নিজে জিংতা অনা। সমাজ ধ্বংস অইলে নিজেউ ধ্বংস। ○

### রাজনীতিত ক্রান্তদর্শী পুরুষর প্রয়োজনীয়তা

যে কোন কাম বা পরিকল্পনা করতে ও কাম উহানর ভবিষ্যতে কীহান অইতই উহান যে জনগই মাতে পারতই উগরেই ক্রান্তদর্শী পুরুষ বুলিয়া মাতারা। ও জনউতার বুদ্ধি লৌশিং অতি চহা। ওসাদে মানু কম জরমঅইতারা। হুদা রাজনীতি নাগৈ ধর্মনীতি অর্থ-নীতি সমাজ বারো দেশর ভবিষ্যত লেপকরিয়া কাম করে যিতারাগা বারো তানু ইতিহাস আকেইহান হংকরিয়া থদিতারা।

ভারতবর্ষত স্বামীবিবেকানন্দ, রবীন্দ্রনাথ ঠাকুর, ঋষি অরিন্দ এসাদে আরাকৌ নমস্য মানু দেশ এহানর গতি ধ্রুবতেরার সাদে লেপকরে দেছি। রাজনীতিরমা চানক্য গীরক নমস্য জন আগো।



ইতিহাসে শিবাজীর সাদে চৌখাত ক্রান্তদর্শী পুরুষ আগো অয়া ভারতে জরম অয়া ভারতর আদি সত্ত্বারে নুবা করে প্রতিষ্ঠা করেছিল। শিবাজীর জীবনী পাকরলে উতা অনুভব করিয়ার। আফজল খার লগে তার উনা অনির দিন উহানাত নিরস্ত্র অয়া তিলনির কথা। কিন্তুমান তা উহানর কীহান গতিহান অইতই উহান হারপেয়া আগেস্তু আঙুলীগিং বাঘনখ হংকরিয়া হবা করে বরেয়া অতি সাবধানে আফজল খার লগে তিলয়া থাংনাৎ দ্বিয়গীয়ে কলকরানীত লেপইলা। শিবাজীয়ে যেহান খালকরেছিল উহান ফলিল। আফজলখা কলরিয়া পিঠিত ছরিহান বহেইতে না বহেইতে শিবাজীয়ে বাঘনখগীলো গারগরন্তু আছুল দিয়া মারে বেহ্ন। ঔ কারণে শিবাজী ক্রান্তদর্শী পুরুষ আগো। উতা ছাড়া সম্রাট ঔরঙ্গজেবর লগে দিল্লীত উনা অইতেগা আকসাটে বাপক-পুতকরে বন্দি করেছিল। ঔ মরণর কথা উগন্ত লৌশিংলো নিকুলিয়া ঠৈগো জিংতা করেছিল উতা আচানকর কথা।

এসাদে ইতিহাসে ক্রান্তদর্শী মানুর সমাবেশ দেশ বারো জাত আহানর ভাগ্য লেপকরে দেৱ। আয়ারল্যাণ্ডর ডি ভ্যালেবার বিপ্লবী ঘটনা আরোকৌ রমকাটা দেৱ। তা আয়ারল্যাণ্ডর স্বাধীনতার নায়কগো আছিল। ঔকারণে লণ্ডনে বৃটিশর জেলে বন্দি আছিল। তা নানান লৌশিংলো জেলর তালাগোর চাবিগোর অবিকল নমুনা যোগাড় করেছিল। থাংনাত ঔ ছবিউহান ইকরিয়া উতার লগে আরাক ছবি আহান দিয়া তার মারুপগর নিঙে দিয়া পেঠা দিল। জেলর মানুৱে চিঠি বারো ছবি উহান দেহিয়া বাজেহান বুলিয়া দিয়া পেঠা দিলা। চিঠিহান সময়মত ফৌরইলগা। মারুপ উগৈ চিঠিহান খুলিয়া ছবিহান দেহিয়া হারপেইলো যে এসাদে মাপর চাবিআগো তারতা লাগের।

হাতে হাতে খ্রীষ্টমাসেডে দিনহান আহিল। ডি ভ্যালোরার কোঠাগত উপহার স্বরূপ কেঙ্গো ফৌরইল। ডি ভ্যালোয়াই কেঙ্গো দেহিয়াউ হারপেইলো— আজি মোর মুক্তির দিনহান আহিল। চামুচ লয়া কেঙ্গত চাপহান দিতেই কেঙ্ শব্দ আহান নিকুলিল। লগে লগে কেঙ্গো ভাগিয়া চাবিগো নিকাল্ল। ঔ দিন বর দিনর হারৌপার রাতিত মানু দিক্ বিদিক্ শূণ্য অছি তাঞ্জাউগৎ চাবিগোলো তালাগো খুলিয়া দাবদেছিল।

ইতিহাসে এরে আচানক রোমাঞ্চকর ঘটনা প্রবাহত কতি চৌখাত লৌশিংপালপা মানু জরম অছিল এহান হারপেয়ার।

এতা এতা কারণে যে জাতে এসাদে ক্রান্তদর্শী পুরুষ জরম অইতারা ও জাত উহান মিমুত নাইতারা।

(বিষ্ণুপ্রিয়া মণিপুরী সাহিত্যত শ্রীপ্রভাস কান্তি সিংহর লেংকরা ‘চৌধুরী মাণিকচান’ লেরিক এহান এসাদে চৌখাত চরিত্রর নিদর্শন আহান)

ধর্মর ক্ষেত্রে ভারতবর্ষত আরাক ক্রান্তদর্শী জন আগো অইলতাই শিখগুরু গোবিন্দ সিংহ। নানকর প্রচলিত ধর্ম উহানরে নুৱা করে দীক্ষিত করেছিল। তা হারপাছিল ভারতে মুসলমানর লগে থাইতে গেলেগা প্রেম ভক্তিরস এতালো কানা নাইতই। পুংখাত যুদ্ধর সাজলো থানা লাগতই। এসাদে করে প্রায় বিশহাজার মানুৱে তার মতে দীক্ষাদিয়া পৃথিবীরমা ধর্ম রক্ষা কারী জাত আহান সৃষ্টি করেছিল। তার শিষ্য উতা হাবিয়ে ‘সিংহ’ টাইটেল ইকরলা। শিখ এতার গুণাবলীত মোহিত অয়া রবীন্দ্রনাথ ঠাকুরে অনেক কবিতা ইকরেছিল। ও কবিতা হাবি মানুর মনে নুৱা চিন্তার সঞ্জীবনী সুধার সাদে কাম করেছিল। কবিতা আহান মনে পড়ের—

‘পঞ্চ নদীর তীরে

বেণী পাকইয়া শিরে

দেখিতে দেখিতে গুরুর মস্তে জাগিয়া উঠেছে শিখ

নির্মম নির্ভিক।

হাজার কণ্ঠে গুরুজীর জয় ধ্বনিয়া তুলেছে দিক্।

নূতন জাগিয়া শিখ

নূতন উষার সূর্যের পানে চাহিল নিনিমিখ।’

ভারতবর্ষত গুরুগোবিন্দ সিংহ, রাণাপ্রতাপ বারো শিবাজী এরে মহান গীরক গাছির জন্ম এহান চিয়োপা ইতিহাস আকেইহান।

বৃটিশ জাতি এহান অতি কুটিল বুদ্ধি সম্পন্ন জাত আহান। এহানর দৃষ্টান্ত বৃটিশর মণিপুর জয় করানির লৌশিঙ এহান খালকরিল কথাহান। মণিপুরী জাত এহান ধর্মভীরু জাতহান। ও কারণে তানু মুঙে গুরু মাহেই থয়া পিঠিত সৈন্য থায়া নিয়াম নুঙেই করে মণিপুর জয় করে পারেছিল।

মহাভারতে ভীষ্মর মুঙে শিখগুরীয়ে থ’দেনায় ভীষ্ম ধনুকহান বেলাছিল। (অজ্ঞানে শ্রীকৃষ্ণর পিঠিত থায়া ক্লার গাদ্দে গাদ্দে ভীষ্ম দেবরে শরশয্যাতে বেলাছিল— এ ঘটনা এহানর লগে মণিপুর যুদ্ধর তুলনা করাণি য়াকরের। ○



রাহু এগো মূলত হিনচাপা আগো। সমুদ্র মন্থনর কালে সাগরেস্ত অমৃত নিকুলিল তান্জা উগত দৌর রূপ ধরিয়া অমৃত পিনাত যিতেগা বিষ্ণুরে হারপেয়া তার মুরগো কাপেদেছিল। উপেইস্ত মুর বারারে রাহু বারো বাকী পেটগর বারা হাবিরে কেতু বুলতারা।

ঔ কারণে মূল আকহান জিনিষেস্ত পুরি যেবাকা আরাক আহান খেইঅয়া নিকুলতৈ উপেইতৎ উহানরে রাহু কেতু রাজনীতি বুলে পারিয়ার।

এরে রাজনীতি এহান হুদা রাজনীতি নাগৈ ধর্ম, সামাজিক সংস্থা, গোষ্ঠী আর-আর বিষয়ে অইতে পারে।

শত্রু এতা দ্বিরকমর— বাহিরর শত্রু বারো ঘরর শত্রু। ঘরর ভিতরে শত্রুতার মাধ্যমে খেয়নি এহানরেই রাহু কেতু রাজনীতি মাতে পারিয়ার।

রাজনীতিরমা দেহিয়ার। রেড্ডী কংগ্রেসেস্ত পুরি ইন্দিরা কংগ্রেস। কমিনিষ্ট পার্টিস্ত সি. পি. এম, সি. পি. আই, (এম, এল) হিন্দু মহাসভাস্ত, জনসঙ্ঘ জনসঙ্ঘস্ত জনতা পার্টি থাংনাত ভারতীয় জনতা পার্টি। ধর্মরমা কেথলিক প্রোটেস্টান, শিয়া-সুন্নি, বুদ্ধ ধর্মত মহাজান বারো হীনযান, বৈষ্ণব ধর্মত আউল, বাউল, কর্ত্তাভজা, কিশোরী ভজন এসাদে নানান খেই খেই মতলো তিলনায়া আলাদা অইতারা।

এরে সংঘাত এহানর নানা কারণ থা যারগা। নুরা বারো পুরানা মতবাদর কারণে সংঘাত। আরাক আহান অইলতাই মানুআগর একনায়কত্ব ভাব। দাপা আহানর স্বার্থর কারণ— প্রতিপত্তির মোহ, এসাদে বহু কারণ থা যারগা।

প্রকৃতিরমা দেহিয়ার ডাঙর ডাঙর গাছ এতা আলাদা আলাদা অয়া নিজ নিজ অস্তিত্ব থইতারা। অন্যবারাদে লতা জাতীয় গাছ এতা আগরে আগৈ কলকরিয়া থাইতারা। ঠিক উসাদে যে যে ফামে শক্তিদর আকেইগি নিকুলতাই উপেইৎ সংঘাতর সৃষ্টি অইতই। কিন্তুমান পাংকালহীন আগই সংঘাতে উবা অনা কঠিন।

জ্ঞানী জন দাপা আহানে বিশ্বব্রহ্মাণ্ড বারো ক্ষুদ্র ব্রহ্মাণ্ড দুহান চিন্তা করেছিল। ঔ মতে বাহিরর প্রকৃতি রূপী সৃষ্টি এহানরে বিশ্ব ব্রহ্মাণ্ড বারো নিজর দেহ এগরে ক্ষুদ্র ব্রহ্মাণ্ড লেপকরিয়া ভজন সাধন করিয়া সিদ্ধি লাভ করেছি।

এরে ক্ষুদ্র ব্রহ্মাণ্ড স্বরূপ এহানেই রাষ্ট্রকেতু রাজনীতি। এফামর রাজনীতি অতি জটিল বারো কুটিল। দেশে দেশে, গাঙে গাঙে, জাতে জাতে নানান সংঘাত সৃষ্টি অর। ও হানর প্রভাবে হিংসা বারো প্রতিহিংসার ফল হিসাবে মানু মারানি, মোকদ্দমা এসাদে নানান কৌলির সৃষ্টি অর।

ঠিক উসাদে বিশ্বব্রহ্মাণ্ড রূপী পৃথিবীর রাজনীতি কুটিল বারো জটিল অয়া চলেছে। দ্বিতীয় বিশ্বযুদ্ধত পূর্ব জার্মানী বারো পশ্চিম জার্মানী বুলিয়া দুহান দেশে খেয়ছিল। এবাকা বারো তিলইলা। এবাকা উত্তর কোরিয়া বারো দক্ষিণ কোরিয়ারমা নিয়াম সংঘাত চলেছে। প্যালেষ্টাইনেও ইজরাইল খেয়নির থাংনাত এবাকা পেয়া দ্বিয় দেশর সংঘাত চলতে আছে—চলতে আছে। নিজর মাতৃভূমি ভারত বারো পাকিস্থান দুহান দেশে খেইঅয়াউ আজি পেয়া শত্রুতালো আছি।

চিন্তাবিদ কতগৈ মাস্তারাতাই একমাত্র নেহেরু বারো জিন্না দ্বিয়গীর সিংহাসন দখলর কারনেই দেশ ভাগ অছেতা।

এরে ছবি আমার সমাজেউ প্রতিফলিত আছে। গাগরার গদী আগন্ত দুহান দল। অন্যান্য সামাজিক সংস্কারমাউ এসাদে ঘটনার প্রত্যক্ষ প্রভাবেও পুরি এবাকা পেয়া মুক্ত নাছি। ○

## রাজনীতির মাধ্যমে স্বার্থ আদায়

মোগল সম্রাট শাহজাহানর রাজত্বকালে জিলক জাহানারার গারিগৎ জিগ পড়িয়া ফাম আহান পুড়েছিল। উপেইং ইংরেজ ডাঃ বাউটন গীরকে মেঙছেলহানর মাধ্যমে ও পূড়া ফাম উহান চেয়া হজকলো বালা করেছিল। উহানর বিনিময়ে ইস্ট ইণ্ডিয়া কোম্পানি ভারতে করমুক্ত বাণিজ্য করার সুযোগ পাছিল।

এ যুগে ইংরেজে যেসাদে বাইবেল লেরিক এহানলো দেশ জয় করেছিল ঠিক উসাদে পশ্চিমবাংলার কমিউনিজম মতাদর্শর মানু ত্রিপুরা রাজ্যত হমেয়া উপেইর মানুরে বুঝেয়া উপেইত ঘাটি হংকরলা। হাতে হাতে বাংলাদেশেও মানু হমা হমা ত্রিপুরা রাজ্যত তানু সংখ্যাগরিষ্ঠ অইলা। সময়মত নির্বাচন অইল। নির্বাচনে জিঙিয়া তানু দেশহানর শাসন ক্ষমতাত বহিলা। মূল অধিবাসী ত্রিপুরীর অস্তিত্ব নিস্তেজ করে দিলা।



উহানলো দূরদৃষ্টি সম্পন্ন নেতা এতাই আপন আপন জাতের অস্তিত্ব রক্ষার সালেদে নানান পথ অবলম্বন করিয়া জাত প্রতিষ্ঠা করিয়া থছি।

এহানাং হাবিস্ত ডাঙর দৃষ্টান্ত আহান অইলতাই ইহুদী বৈজ্ঞানিক কাইম ভাইজমেন গীরকর ত্যাগ। দ্বিতীয় বিশ্বযুদ্ধত গীরক এগো বৃটিশর যুদ্ধ বিভাগর বৈজ্ঞানিকগো আছিল। বৃটিশর দুর্দশার দিনে যুদ্ধর হাদিত কৃত্রিম ভাবে এসিটোন আবিষ্কার করিয়া বৃটিশ জাতহানরে জিৎতা করেছিল। ইংরেজ জাত এহানে তার এরে অবদানর বিনিময়ে যুদ্ধর থাংনাং তারে কমন্স সভাত ডাহিয়া সম্মান জানেয়া তা কীহান চার উহান আংকরেছিল। ঔপেইং তা মাতেছিলতাই — ‘মি কিন্ডাউ নাচাউরী, কিন্তু মোর ইহুদী জাত এহান জিৎতা অয়া থানার সালেদে মাটি আহান চাউরী।’

ঔ সময়ে পালেষ্টাইন বৃটিশর কলোনীগো আছিল। গীরকর কথামত বৃটিশ ইজরাইল রাষ্ট্র হংকরে দিয়া তানুরে প্রতিষ্ঠা করেদিল। অতি সংক্ষেপে এহান দীঘল ইতিহাস না ইকরিয়া মূল ঘটনাহান ব্যক্ত করলু।

এ বিষয় এহান ইকরতে আমার নরসিংহপুর লয়ার ঘটনা আহান নিংশিঙ অইলু। ঔসমইত পুলকেশী সিংহ গীরক যুবসমাজে শিক্ষা দীক্ষায় নেতৃত্ব দেনার নেতা আগো হিসাবে চিনত অছিল। মইনুল হক চৌধুরীয়ে তারে কংগ্রেসে নিয়া বিধায়ক নির্বাচনে উবা করিয়া জয়ী করেছিল। চৌধুরী গীরকর ভিতরর রাজনীতি আছিলতাই তার সময়ে বিধায়কর এলাকা নুৰা করে চিনং অইতৈ ঔপেইং তারেল মুসলমান সংখ্যাগরিষ্ঠ করিয়া সোনাই চক্র হংকরানী।

কিন্তুমান পুলকেশী সিংহ গীরক চৌধুরী গীরকর প্রস্তাব নাকরিয়া হিন্দু সংখ্যাগরিষ্ঠ হিসাবে সরকাররাং রিপোর্ট সমজাছিল। মইনুল হক চৌধুরীর লগে তার মতানৈক্য অইল। হক সাহেব গীরকে কংগ্রেস পার্টির শক্তির মাধ্যমে সোনাই এলাকাগরে মুসলমান গরিষ্ঠ করিয়া হংকরেছিল। থাংনাত উদীয়মান নেতা আগরে রাজনীতিস্ত সন্যাস নেওরানিৎ বাধ্য করেছিল।○

## জিৎতা অনির পথ বিছারেয়া

পৃথিবীর প্রত্যেক জাতের উত্থান বারো পতন এহান চক্রগর সাদে বুলেরহান। জীবন এহান ছদা হারৌলো বারো দুঃখলো থার কোন ইতিহাস নেই। হারৌ-দুঃখ দ্বিহানি আকসাটে চলিয়া থারহান। ঔ কারণে বাধ্য অয়া সময়ে সময়ে মানু নিজর অস্তিত্ব জিৎতা করানির সালেদে সংগ্রাম করতে বাধ্য অইতারা।

যুদ্ধরমা সৈন্য বারো আতিয়ার প্রয়োজন অর। ঠিক উসাদে জাত আহানর অস্তিত্ব লেপকরতে প্রয়োজন অরতাই ঔ জাতরমা জরম অছি মানুর অবস্থান।

জাত উহানাং জরম অসি মানুর ঠৌনা, নাপ্পাল, লৌশিং, একাগ্রতা, জাতিপ্রেম, আত্মত্যাগ, মানসিক, শারীরিক, আধ্যাত্মিক এসাদে নানান গুণর মাধ্যম বিবেচিত অর।

ঔতার হাদিত শাস্ত্রকারে মাতেছিতাই বংশর সৌ এতা তিন রকমর অয়া জরম অইতারা— (১) উত্তম সন্তান, (২) মধ্যম সন্তান (৩) অধম সন্তান।

উত্তম সন্তান উগো বংশরে গজর থাকে প্রতিষ্ঠা করের অন্যরাং সম্মান প্রাপ্ত অর।

মধ্যম উগো বংশর সমতা জিৎতা করের।

অধম সন্তান উগই বংশর হাবিতা নাশ করের।

উহানেতে ছদা জাতর কথা মাংলে না চলতই। জাতর ভিতরে উত্তম, মধ্যম বারো অধম এ তিন ভাবর মানুর লগে সংঘাত নিজর ভিতরেই থাইতে বাধ্য। যেসাদে আতহানর পাচগো আঙুলী সমান নেই উসাদে হাবি জাতেউ হাবির মনোবৃত্তি তিল নেই।

এরে অবস্থাত এমন জিনিষ আহান আছে যেহানর মাধ্যম বিভিন্ন মনোবৃত্তির মানু আকপেইং তিলয়া নীতিআহান মুঙেথয়া নিজর জিৎতা অনির পথে একতাবদ্ধ অইতারা ফাম আহান আছে। ঔ ফাম উহানর নাঙ— ধর্ম। ধর্ম আহান থাইলে ধর্মর লেরিক আহানৌ থানা লাগের। ঔ কারণে ধর্মগ্রন্থ আহানর মাধ্যম এহানেই জাতআহান তিলনির ফামহান। এ বিষয়ে স্বামী বিবেকানন্দ গীরকর বাণী আহান তলে ইকরে দিলু—



“যে সকল ধর্ম সম্প্রদায়ের একখানি গ্রন্থ আছে সেই গুলি ব্যতীত সকল সম্প্রদায়ই লোপ পাইয়াছে। আপনাদের মধ্যে কেহ কেহ পার্শীদের কথা শুনিয়াছেন। ইহারা প্রাচীন পারশ্যবাসী —এক সময়ে ইহাদের সংখ্যা দশ কোটি ছিল। আরবীয়রা ইহাদের অধিকাংশকে পরাজিত করিয়া মুসলমান করিল। অল্প কয়েকজন তাহাদের ধর্ম গ্রন্থ (জেন্দ আবেস্তা) লইয়া পলয়াণ করিল এবং তাহারা সেই ধর্ম গ্রন্থের বলেই এখন ও টিকিয়া আছে। ইহুদিদের কথা ভাবিয়া দেখুন যদি তাহাদের একটি ধর্ম গ্রন্থ না থাকিত তাহারা জগতে কোথায় মিলাইয়া যাইত। কিন্তু ঐ গ্রন্থই তাহাদের জীবনী শক্তি রক্ষা করিয়াছে অতি ভয়ানক অত্যাচার সত্ত্বেও তাহাদের ধর্ম গ্রন্থ তাহাদিগকে রক্ষা করিয়াছে” (স্বামীজীর বাণী ও রচনা ৪র্থ খণ্ড)

বাস্তব ক্ষেত্রেত মি নিজে মাত্র এরে কথা চুটি এহান পাকরিয়া বছর আহান চিন্তা করিয়া গীতা এহানরে আমার ধর্ম পুস্তকহান বুলিয়া ভূমিকাত প্রমাণ দিয়া আকসাটে ১৯৯০ইং দুই হাজার কপি ছাপেয়া সমাজে প্রচার করানির সিজিল করেদিলু। ও কপি লয়য়া এবাকা দ্বিতীয় সংস্করণর ব্যবস্থা অসে।

মাতে গেলেগা পৃথিবীর ডাঙর সম্পদ আহানরে বিশ্বাস করিয়া মুণ্ডে থয়া যাত্রা করেছি আচেংপা জাত এহান।

আরাক আচানকর কথা— বিশ্ববিখ্যাত ইহুদী বৈজ্ঞানিক অপেন হাইমার মেক্সিকো মরুভূমিত পয়লা এটম বোমাগো পরীক্ষা করেছিল দিন উহান ১৯৪৫ইংরেজীর ১৪ই জুলাই।

ও দিন বোমাগো ফাটানির থাংনাং বোমাগর ডর পেইল মাচাক রূপহান দেহিয়া গীতার বিশ্বরূপ দর্শনর ১২নং শ্লোক উহান উচ্চারণ করেছিল।

‘দিবি সূর্য সহস্রস্য ভবেদ যুগপ দূষিতা।

যদি ভাঃ সদৃশী সা স্যাদ বাসন্তস্য মহাত্মনঃ।।’

বৈজ্ঞানিক আগর শ্রীমুখেন্ত সংস্কৃত শ্লোক নিকুলানি আচানকর কথা। কিন্তুমান গীরকেই সংস্কৃত গীতা পুরাপুরী অধ্যয়ন করেছিল। এতা খালকরানি থক অন্য জাতরনাং গীতার কতিহান সমাদর। গীতা গ্রন্থ এহানাং আমার বপাক অর্জুন গীরকরে ভগবান শ্রীকৃষ্ণই কতিহান বানা পাসিল উহান তলর ইকরা কথা উহানির সমাজে গুরুত্ব দিয়া নিংশিং অনিথক—

‘হাবিত্ত পুরি আচেৎপা বুলিয়া আরাক কথা আহান এবাকা হন— তোরে মি নিয়াম বানা পাউরি, উহানে তোর হবারকা মাতৌরিতাহে।

মোরাং মনহান কাৎকর, মোরে নিঙকর, মোরে পূজা কর, মোরে হমাদে। মি ছতোমেউ সেত্য করিয় মাতৌরিতা— তি মোর নিয়াম নুংশিপাগো— মোর কথা ইলায় চললে মোরে পাযিতেইগা। (মোক্ষ যোগ ৬৪-৬৫)

এসাদে অভয় বাক্য যে গীরকরাং মাতে গেছেগা ঔ বংশ উহনর মানু কতির চুয়া ধন্য অছি উহান উপনির কথাহান।

এবাকাতে আমার জাত এহান লগে আরাক দাপা আহানর সম্যক ইতিহাস হারপেইলে আরাকৌ আমার ভবিষ্যতর পথগো ঙালইতই বুলিয়া পার্শী জাত এহানর ডেই ডেই হারা ছবি আহান উপপারতাঙাই।

এবাকার ইরান রাজ্য এহানর প্রাচীন নাঙহান আছিলতাই পারশ্য। ৬৪১ খৃষ্টাব্দে আরবিয় মুসলমান এতাই পারশ্য জয় করিয়া নূরা রাজ্য আহানর ধনসম্পদ অধিকার করিয়া ভাগ করিয়াউ তৃপ্তি নায়া পার্শী এতারে নানান অত্যাচার করিয়া ধর্মাস্তরিত অকরলা। উচ্চ বর্ণর পার্শী উতাই ইসলাম ধর্ম গ্রহন করানিও মরানিয়ে বালা বুলিয়া নিয়াম তাপিত্বলো মাতৃভূমি এরাদেনাত লেপইলা। ৭৬৬ খৃষ্টাব্দত হোরমুজ বন্দরেও সাগরর পথে ভারতে ফৌবইলা। গুজরাটে আশ্রয় লয়া উপেইর বাসিন্দা অয়া ভারতর হিন্দুর সাদে ফেইচম, কয়ৎ লাগেয়া গুজরাটি ভাষা হিকিয়া তানুর জাতহান জিংতা করেছি। টাটা, পেটেল এতা তানুর উত্তর পুরুষ। তানু ধন ঐশ্বর্য্য হাবিতা ত্যাগ করলেউ ধর্মতে ত্যাগ নাকরেছি। এবাকা তানু মাত্র ১ লক্ষ জনসংখ্যার গোষ্ঠী আহান।

এরে পার্শী জাত এহান বিষ্ণুপ্রিয়া মণিপুরীর সাদে নিজ দেশে অস্তিত্ব মাংকরিয়া পরদেশে নিজ নিজ ভাষা ধর্ম সংস্কৃতি জিংতা করিয়া থয়া আছি।

পার্শী জাত এহানর জন সংখ্যা কম অইলেউ ধন পয়সার বারাদে অতি উন্নত। তানুর নিজস্ব তহবিলর (ফাণ্ডর) মাধ্যমে তানু পুরা-পুরি সুরক্ষিত। উল্টা তানুর জন সংখ্যা বারানিরকা প্রচুর রূপা খরচ করতারা। জমশেদজী টাটা বারো জেনারেল মানেকশো এতা ভারত বিখ্যাত পার্শী। বিষ্ণুপ্রিয়া মণিপুরী জাত এহানর এক অয়া থানার ডেকী মূল সম্ভা ঠিক আছে। হাবির ভাষা, ধর্ম সংস্কৃতি উপাধি



আক্হান। এহান অতি ডাঙর সম্পদ আহান।

ঔ কারণে এ জাতেন্ত আজি পেয়া জেলে কয়েদী নেই, চোর, ডাকাত, বেয়াপা অত্যাচারী, বিদেশে বেয়াপা বেছেকুরা, জালনোটর কারবার, বেয়াপারে বেশ্যা হংকরিয়া পয়সা কামানি এসাদে তলপা কাম এতান্ত দুরেইত সেচিয়া আছি। এরে ছরু-ছরকাঙ জাত এহানাং ভুবনেশ্বর সাধুঠাকুর নারদ বাবা বারো আথে বাবার সাদে সিদ্ধপুরুষর আবির্ভাব এহান কম কথা হান নাগৈ।

স্বাধীনতার থাংনাং, সংবিধানে পার্শী জাত, পাহাড়ী জাত অইলে আলাদা সুযোগ সুবিধা পেইতারা এতালো না খালকরেছিল। নিজরে ক্ষত্রিয়র গজর থাকর জাত আহান বুলিয়া পরিচয় দিয়া আছিল। ঔ সময় মানে-ইংরেজ রাজত্বর চাকুরী নাউ করলা। নিজর উৎপাদিত সামগ্রিলো জিংতা অয়া আছিল। শিক্ষা বারো সংস্কৃতি এতালো নিয়াম ব্যস্ত অয়া আছিল।

বরাক উপত্যকায় দেশীয় বাঙালী আছিল। বিষ্ণুপ্রিয়া মণিপুরী, মৈতেই বারো হিন্দুস্থানী আসিলা উপেইত রাজনীতিত প্রেম, সরলতা এতা থানার করানে হাবি জাতি আকসাটে অংশ নেছিলগা।

যেবাকা বাংলাদেশে পুরি বহিরাগত বাঙালী হিন্দু বারো মুসলমান আয়া জন সংখ্যার কাটামহান তঙাল করেদিলা উপেইন্ত পুরি ভূমিপুত্র এতা নিজর সম্বা জিংতা করানির চিন্তাত পরেসিতা।

ছরকাঙ জাতআহান যেবাকা বিপদে পড়ের ঔবাকা ডাঙর শক্তির আশ্রয়ে যানা লাগের। এহান শাস্ত্রর কথাহান। এবাকতে আমার আশ্রয়র ছাতিগো ঠিক নেই। রাজনীতিত বোয়ালে ছরকাঙ মাছ খেইতারা। আমারে আশ্রয় দিতাই উতাই তানুর স্বার্থেই ব্যবহার করতাই। উ কারণে আলাদা সম্বা থয়া কোনমতে পথ বিসারেয়া আছিত।

অন্যবারাদে পাহাড়ী জাত এতারে ধন পয়াসলো শিক্ষা দীক্ষালো মন আছুলিয়া ইংরেজ এতাই পূর্বাঞ্চলর পাহাড়ী হাবিরে খৃষ্টান হংকরিয়া তানুর লগর আকতা হংকরিয়া ভারতীয় সংস্কৃতি খেইকরিয়া আলাদা ভাবে খৃষ্টান রাজত্ব হংকরলা। প্রতি বছর বিদেশে দশহাজার কোটি সাহায্য পেয়া তানুর রাজনীতির খুটিগো দরা করলা। তানু এবাকা ১০লক্ষ সংখ্যালো রাষ্ট্র হংকরিয়া ৬০গো বিধায়ক অয়া ট্রাইবেল সেল পেয়া জিংতা অছি।

অন্যবারাদে আমি আদি হিন্দু অইয়াউ পয়সা আহন নাপাছি। যত হিন্দু নেতা এতাই কমিনিউটি, কংগ্রেস এতালো হুককাঙ জাত এহানর মেরুদণ্ড বাগেদিয়া থদিল।

আমার সাদে পাহাড়ী রিয়াং হিন্দু এতাউ এসাদে লাংলাত পরেছি। নেতা নেই জাত এতার এরে দুর্দশা এহানান্ত জিংতা অনির সালেদে আমারতা সংবিধানর মাধ্যমে পথ বিছারানি লাগতই।

ভারতর সংবিধানে মানুতে থাক পুণ্ড পাহিয়া পেয়া জিংতা অনির পথ থদেছে। আসামর গণ্ডার জিংতা করানির সালেদে আইন হংকরিয়া কোটি কোটি ধন খরচ অর। উতা ছাড়া আন্দামান নিকোবর দ্বীপপুঞ্জর জরোয়া বুলিয়া আদি বাসিন্দারকা আইন হংকরিয়া থছি।

এতা ছাড়া রাষ্ট্রসংঘর মাধ্যমে আরাকৌ International Law আকতাউ আছে। যদি আর দেশর সরকারে আমারে জিংতা নাকরে ঔহান অইলে আমি রাষ্ট্রসংঘর আইনলো লরে পারিয়ার। ঔকারণে হুদা সংগ্রাম নাগে সংগ্রামর লগে আইনর অধিকার মুঙে থয়া আন্দোলন করলে নিশ্চয় ফল পেইতাঙাই।

রাষ্ট্রসংঘর ইনডিজেনাস পিপল এক্ট ২৬নং ধারায় ১ বারো ২ এ এহানর পূর্ণ সংরক্ষণর ব্যবস্থা আছে। তদুপরি সংখ্যালঘুর ভাষা সংরক্ষণরৌ পথ থদেছি।

মূলত এহানি মাতানি য্যাকরের— যমরাজা গীরকে সত্যবানর ঠৈগো আতে থয়া— ‘সত্যবান জিংতা অনা ছাড়া অন্য বর মাগ’ বুলিয়া ঘটনা উহান অছেতা।

আমার সরকারৌ সংবিধানে ধারা মাহেই থয়া আমারে বিধান সভাত প্রতিনিধিত্ব করতে সংখ্যার য্যারী দেহ্যার। অন্যবারাদে মিজো, নাগা এতাই ১৫-২০ হাজার লো বিধায়ক মন্ত্রী পালয়া আছি। আমারতাউ প্রয়োজনে সংবিধানর সংশোধনর মাধ্যমে জিংতা অনি লাগতই। গণতন্ত্রত হাবিতা সম্ভব। বা সংস্কারর মাধ্যমে অস্তিত্ব রক্ষা করানির ব্যবস্থা করানি শ্বৈনেই লাগতই। গণতন্ত্রত হাবিতা সম্ভব প্রয়োজন শুধ তাল-তান্জা থামতলে— ভারত সরকারর original inhabitant act of India, 2003 ইংরেজীর সংশোধন আইনর(৩) ধারা আলোচনা করানি থক। ○



গ্রন্থহান ছাপানির সাহায্য করেকুরা গিরক গাছির নাঙ দেনা অইল—

- ১। শ্রী বীরেন্দ্র সিংহ (গীতোত্তম)  
প্রাক্তন অধ্যাপক, শিলচর।
- ২। ড० নলিনীকান্ত সিংহ  
প্রাক্তন অধ্যাপক, গৌহাটি।
- ৩। ড० মানস সিংহ, অধ্যাপক।
- ৪। শ্রীনামদেব সিংহ  
প্রাক্তন অধ্যাপক, সিঙ্গারী।
- ৫। শ্রী মণীন্দ্রকুমার সিংহ, IFS  
প্রাক্তন কনজারফেটর অব ফরেস্ট
- ৬। শ্রী নিশীরঞ্জন সিংহ  
প্রাক্তন অধ্যাপক, শিলচর।
- ৭। শ্রী মৌর সিংহ  
প্রাক্তন কৃষি বিষয়া, গড়েরবন্দ
- ৮। শ্রী জ্যোতিষ সিংহ (বাবু)  
সমাজকর্মী, সিঙ্গারী।
- ৯। শ্রীসঞ্জু সিংহ  
অধ্যক্ষ গুরুকুল কলেজ, পাথারকান্দি।
- ১০। শ্রী নিখিল সিংহ  
ইলেক্ট্রিক ডিভিশন, পাথারকান্দি।
- ১১। শ্রী সেনাতাম্ফা সিংহ  
সমাজকর্মী, পাটডালী।
- ১২। শ্রী চন্দ্রকান্ত সিংহ  
প্রাক্তন প্রধান শিক্ষক, রূপা।
- ১৩। শ্রী বিষ্ণুপদ রাজবংশী  
প্রাক্তন শিক্ষক, দুর্গভছড়া।
- ১৪। শ্রী ব্রজগোপাল সিংহ  
প্রাক্তন অধ্যক্ষ, দুর্গভছড়া।
- ১৫। শ্রী লক্ষীকান্ত সিংহ  
প্রাক্তন প্রধান শিক্ষক, পাতিয়ালা।


- ১৬। শ্রী অনিলকৃষ্ণ রাজকুমার  
প্রধান পরামর্শদাতা,  
নিঃ বিঃ মঃ ছাত্র ইউনিয়ন, কালিঞ্জর।
- ১৭। শ্রী নীশিকান্ত সিংহ  
ডি. আই. অফিস, শিলচর।
- ১৮। শ্রী বিশ্বভূর রাজকুমার  
প্রাক্তন বুক ডেভলাপমেন্ট,  
অফিসার, শিলচর
- ১৯। শ্রী যতীন্দ্র কুমার সিংহ  
প্রাক্তন প্রধান শিক্ষক, দুধপুর
- ২০। শ্রী শশীকান্ত সিংহ, দুধপুর  
ইন্ডিয়ান ব্যাঙ্ক।
- ২১। শ্রী সুরেন্দ্র সিংহ, দুধপুর  
সাবইন্সপেক্টর (এপিআর)
- ২২। শ্রী নির্মল সিংহ  
অধ্যাপক, মাইবং কলেজ।
- ২৩। শ্রী ফুলবাবু সিংহ  
প্রাক্তন সেনা কর্মী, কাটাখাল
- ২৪। শ্রী রুক্ষিণী কুমার সিংহ  
প্রাক্তন এ. পি. মেম্বার, পূর্বখল।
- ২৫। শ্রী মুরলী সিংহ  
প্রাক্তন বায়ুসেনা কর্মী, কাটাখাল।
- ২৬। শ্রী সূর্যকান্ত সিংহ (সঠি)  
সমাজ কর্মী, বেকীরপার।
- ২৭। শ্রী অনিমা সিংহ  
এ. পি. মেম্বরা, নরসিংপুর।
- ২৮। শ্রী রাসবেহারী সিংহ, সভাপতি  
কৃষি ও সমাজ বিকাশ সমিতি, নরসিংপুর
- ২৯। শ্রী আনন্দ মোহ সিংহ,  
প্রাক্তন প্রধান শিক্ষক, বেকীরপার।

গ্রন্থহান ছাপানির সাহায্য করেকুরা গিরক গাছির নাঙ দেনা অইল—

- ৩০। শ্রী হরিকুমার সিংহ  
প্রাক্তন কাউন্সিলার, নরসিংপুর
- ৩১। শ্রী মিহির সিংহ  
অধ্যাপক, এস. আর. কলেজ, কালহীন
- ৩২। শ্রী সূর্যকান্ত সিংহ  
প্রাক্তন সভাপতি, নরসিংপুর জি. পি.
- ৩৩। শ্রী রীতা সিংহ  
প্রাক্তন সভাপত্নী, নরসিংপুর, জি. পি.
- ৩৪। শ্রী দিবাকর সিংহ  
প্রাঃ এ. পি. মেম্বার, নরসিংপুর, জি. পি.
- ৩৫। শ্রী বারীন্দ্রকুমার সিংহ  
প্রাক্তন অধ্যাপক, শিলচর।
- ৩৬। শ্রী মহেন্দ্র সিংহ, M.A. LLB.  
এডভোকেট, শিলচর
- ৩৭। শ্রী বীরেন্দ্র সিংহ  
প্রাক্তন সেনাকর্মী, রাখালটিলা


- ৩৮। শ্রী সাধন সিংহ, সভাপতি  
ভুবনেশ্বর সাধুঠাকুর আশ্রম, টিকর বুরুঙ্গা
- ৩৯। ড০ বিমল সিংহ  
অধ্যাপক সোনাই M.C.D কলেজ।
- ৪০। শ্রী বিমলানন্দ সিংহ  
প্রাঃ সুপাররিনটেনডেন্ট,  
(ASEB) নরসিংপুর
- ৪১। শ্রী ধপদতি সিংহ  
প্রাঃ কোঅপারেটিভ বিষয়া, নরসিংপুর
- ৪২। শ্রী চিত্তামণি সিংহ  
প্রাঃ ডেপুটি ডাইরেক্টর  
সঙ্গীত নাটক একাডেমি, নরসিংপুর।
- ৪৩। ড০ বিষ্ণুপ্রসাদ সিংহ  
অধ্যাপক ওয়েস্ট শিলচর কলেজ।
- ৪৪। শ্রী অমরেন্দ্র সিংহ  
প্রাক্তন প্রধান শিক্ষক, দুধপুর।





## লেখকৰ পৰিচয়

নাঙ- শ্ৰী ইন্দ্ৰকুমার সিংহ  
বাপক- \*নিমথেম সিংহ, মালক - \*আকুপী সিংহ  
গাঙ - ভাটিৰগ্ৰাম, নৱসিংহপুৰ  
জন্ম- ১৯৩২ইং ৯ অগ্ৰহায়ন, শুক্ৰবাৰ



কৰ্মক্ষেত্ৰ— ছাত্ৰ জীৱনেও সমাজৰ কামে ব্ৰতী অছিল সমগ্ৰ নৱসিংহপুৰ এলাকা হাপদিয়া পয়লা তৰুণোদয় লাইব্ৰেৰীৰ প্ৰতিষ্ঠা কৰিয়া শিক্ষাৰমা নুৰা জাগৰণ কৰেছিল। ঔ লাইব্ৰেৰী উগং আমেৰিকাত পুৰি প্ৰচুৰ লেৰিক সাহায্য কৰেছিল। বাৰমুনী লয়াৰ শিক্ষা বিস্তাৰে ঔ লাইব্ৰেৰী উগৰ অবদান অনেক আছিল।

বৰ্তমানে সমাজে একমাত্ৰ প্ৰবীণ সাহিত্যিকগো। নাটক, ছোটগল্প, উপন্যাস, প্ৰবন্ধ অনুবাদ সাহিত্যত অবদান সমাজৰাং স্বীকৃত। সরকার বাৰো সমাজৰ নানান প্ৰতিষ্ঠানেও অনেক স্বীকৃতি দেছিল।

আসাম সৰকাৰেও ২০০০ ইংৰেজীত সাহিত্যিক পেনশন; দিল্লীত দলিত সাহিত্য পুৰস্কাৰ; বিষ্ণুপ্ৰিয়া মণিপুৰী সাহিত্যসভাত- নাট্যশ্ৰী, বিঃ মঃ সাহিত্য একাডেমীত সাহিত্য ৰত্ন; কৃষিও সমাজ বিকাশ সমিতিত সাহিত্য ৰথী, বিঃ মঃ কালচাৰেল ট্ৰেনিং কেন্দ্ৰত সাহিত্য সুধাকৰ, ৰামগোপাল একাডেমীও সাহিত্যশ্ৰী এতা উপাধি দান কৰেছি। উতাছাড়া হাইলাকান্দিৰ কবি সন্মিলনীৰ মানপত্ৰ, দিলীপ স্মৃতি পুৰস্কাৰ, হাইলাকান্দি, গৌহাটিও-নুৰাদৃষ্টি পুৰস্কাৰ দেনা অছিল।

বিষ্ণুপ্ৰিয়া মণিপুৰী ভাষায় পয়লা V.D.O ফিলিম 'হৰিবলা এ-হৰি' শ্ৰীদেবদত্ত সিংহ পৰিচালনাত ফংঅছিল।

চাকুৰী জীৱনে ব্লক ডেভলাপমেণ্ট অফিসাৰ পদেও অবসৰ নেছেগা।

মণিকান্ত সিংহ

সাধাৰন সম্পাদক

বিষ্ণুপ্ৰিয়া মণিপুৰী সাহিত্য সভা